

JON

JEPTA 1

- [Jn 1.1] Ilo jinoin Naan eo, im Naan ippān Anij, im Naan Anij.
- [2] E in ilo jinoin ippān Anij.
- [3] E ar kōmman men otemjej; im ejjelok men eo E ar jab kōmmane, men eo emōj kōmmane.
- [4] Mour ilo E, im mour meram an armej ro.
- [5] Im meram ej romaak ilo marok, im marok e ar jab bōk e.
- [6] Ar jilkintok juon armej jān Anij, im etan Jon.
- [7] E in ej itok kōn kōnnaan, bwe en kōnnaan kōn Meram, bwe armej otemjej ren tōmak kōn e.
- [8] E jab Meram eo, a e ar itok bwe en kōnnaan kōn Meram eo.
- [9] Eo Meram emool, ej kameram armej otemjej, im itok ñan laj.
- [10] E ar pād i laj, im E ar kōmanman laj, im laj e jaje E.
- [11] E ar itok ñan men ko An, im ro doon raar jab bōk E.
- [12] A ro raar bōk E, E ar lelok ñan er bwe ren erom nejin Anij, ñan ro rej lōke Etan:
- [13] Ro raar lotak, jab jān bōtōktōk jab jān ankilaan kanniōk, jab jān ankilaan armej, a jān Anij.
- [14] Im Naan e ar kanniōk im pād ipped, (im jaar kallimjek An aiboojoj, aiboojoj āinwōt an juon wōt ri keotak jān Jemen) eobrak kōn jouj im mool.
- [15] Jon ej kōnnaan kōn E, im lamōj, im ba, E in eo I ar kōnono kake, Eo ej itok ālikū emman jān eō; bwe E kar mokta jān eō.
- [16] Bwe kōj otemjej jaar bōk jān An eobrak im jouj ioon jouj.
- [17] Bwe ar letok kien kōn Moses, a jouj im mool raar itok kōn Jijej Kūraij.
- [18] Ejjelok armej e ar lo Anij jab dewōt iien; juon wōt Nejin E ar keotak, Ej pād i ubōn Jemen, E ar kwaļok E.
- [19] Im men in Jon ej kōnnaan, ke ri Ju ro raar jilkinlok ñan e pris ro im ro ri Livai jān Jerusalem bwe ren kajjitōk ippān, Wōn kwe?
- [20] Im ej kwaļok, im jab kaarmejjete; im ej kwaļok, Ņa I jab ri Kūraij.
- [21] Im rej kajjitōk ippān, Innām ekōjkan? Kwōj Elaija ke? Im e ba, I jab e. Kwe ri kanaan eo ke? Im e uwaak, Jab.
- [22] Innām re ba ñan e, Wōn kwe, bwe kōmin uwaak ro raar jilkintok kōm. Ta eo kwōj ba kōn kwe?
- [23] E ba, Ņa ainikien juon ej lamōj i āne jemaden, Kwōn kajimwe ial an Irooj, āinwōt Aiseia ri kanaan e ar ba.
- [24] Im ro jilkintok er jān Parisi ro.
- [25] Im rej kajjitōk ippān, im ba ñan e, Innām etke kwōj peptaij, eļañne kwō jab ri Kūraij, ak Elaija, ak ri kanaan eo?
- [26] Jon ej uwaak er im ba, Ņa ij peptaij kōn dān; a juon ej jutak eoļōpemi, Eo kom jaje;
- [27] Aet Eo ej itok ālikū, kworōn ballin neen I patkake bwe in jeļate.

- [28] Emōj kōmanman men kein ilo Betani i reear in Jordan, ijo Jon e ar peptaij ie.
- [29] Raan eo ilju Jon ej lo Jijej itok ñan ippān, im ba, Lo, Łaam an Anij, Eo ej bōkļok an laļ jerowiwī!
- [30] E iņ eo ij ba kake, Ālikū juon emman Ej itok eutiej jān eō; bwe E ar mokta jān eō.
- [31] Im I ar jaje E; a bwe kōn kwaļok E ñan Israel, kōn men iņ ij itok im peptaij ilo dān.
- [32] Im Jon ej kōnnaan im ba, I ar lo Jetōb kālaļtak, āinwōt muļe, jān lañ, im Ej pād ioon.
- [33] Im I ar jaje E; a Eo e ar jilkintok eō bwe in peptaij ilo dān, e ar ba ñan eō, Ioon Eo kwō naaj lo Jetōb kālaļtak, im pād ioon, e iņ eo ej peptaij ilo Jetōb Kwōjarjar.
- [34] Im I ar lo im kōnnaan bwe E iņ Nejin Anij.
- [35] Bar juon, raan eo ilju, Jon e jutak, im ruo iaan ri kaļooran;
- [36] Im ej kallimjek Jijej ke ej etetal, im e ba, Lo, Łaam an Anij!
- [37] Im ro ri kaļooran, erro rej roñ an kōnono, im rej ļoor Jijej.
- [38] Innām Jijej ej oktak im lo aer ļoor E, im E ba ñan er, Ta eo komro pukot e? Re ba ñan E, Rabbai (ukōtōn naan iņ Ri Kaki) Kwōj pād ia?
- [39] E ba ñan er, Itok im kom naaj loe. Kōn men iņ rej itok im lo ijo Ej pād ie, im pād ie, im pād ippān ilo raan eo; bwe enañin emān awa.
- [40] Juon iaan ro raar roñ an Jon kōnono, im ļoor E, e Andru, jaten Saimōn Piter.
- [41] Mokta ej pukot Saimōn jein, im ba ñan e, Kōm ar lo Messaia, (ukōtōn naan Kūrai.)
- [42] Ej āñintok e ñan Jijej. Ke Jijej ej lo e, E ba, Kwe Saimōn nejin Jon, naaj likūt etaņ Sipas (ukōtōn naan iņ Piter.)
- [43] Ilo raan eo ilju Jijej e kōņaan ilok ñan Galili, im Ej lo Pilip: im Jijej e ba ñan e, Kwōn ļoor Eō.
- [44] Im Pilip e ri Betseida, jikin kwelok an Andru im Piter.
- [45] Pilip ej lo Natanael, im ba ñan e, Kōm ar lo E, eo Moses ilo kien, im ro ri kanaan raar je kake, Jijej ri Nazeret, nejin Josep.
- [46] Im Natanael e ba ñan e, Jabdewōt men eo emman ej itok jān Nazeret ke? Pilip e ba ñan e, Kwōn itok im lo e.
- [47] Jijej ej lo Natanael itok ñan ippān, im E ba ñan e, Lo, ri Israel emool, ejjeļok moņ ippān!
- [48] Natanael e uwaak im ba ñan E, Kwō jeļā ña jān ia? Jijej e uwaak im ba ñan e, mokta jān an Pilip kūrtokeok, ke Kwar pād iumwin wōjke fig, I ar lo eok.
- [49] Natanael e uwaak im ba ñan E, Rabbai, Kwe Nejin Anij; Kwe kiñ in Israel.
- [50] Jijej e uwaak im ba ñan e, Bwe Ij ba ñan eok, I ar lo eok iumwin wōjke fig, kwōj tōmak ke? kwō naaj lo men ko reļap jān men kein.
- [51] Im E ba ñan e, Emool, emool, Ij ba ñan eok, Tokālik kwō naaj lo lañ epelļok, im enjeļ in Anij rej wanlōñļok im wanlaļtak ioon Nejin armej.

JEPTA 2

- [Jn 2.1] Im raan eo kein ka jilu juon pālele ilo Kena in Galili; im jinen Jijej ej pād ijo.
- [2] Im rej jiroñ Jijej im ro ri kaļooran, bwe ren itok ñan pālele eo.
- [3] Im ke e mat wain, Jinen Jijej e ba ñan E, Ejjeļok wain ippaer.
- [4] Jijej e ba ñan e, Kōrā, ta eo ippa im ippam? awa eo Aō e jañin itok.
- [5] Jinen e ba ñan ro ri korijer, Men eo jabdewōt Ej ba ñan kom, koṃwin kōṃanṃane.
- [6] Im jiljino jāpe dekā in dān rej pād ijo, āinwōt ṃanit in karreo an ri Ju ro, joñoul im jiljilimjuon ak roñoul im ļalem galōn ilo juon ñe ej lōñ.
- [7] Jijej e ba ñan er, Koṃwin teiñ jāpe in dān ko kōn dān. Im rej teiñi im lōñ.
- [8] Im Ej ba ñan er, Koṃwin katōṛļok kiiō, im bōkļok ñan irooj in kwōjkwōj. Im rej bōkļok.
- [9] Ke eṃōj an irooj in kwōjkwōj edjoñ dān erom wain, im e jaje jān ia eo, (a ro ri korijer raar katōṛļok dān re jeļā) irooj in kwōjkwōj ej kūrtoke ļeo pālele,
- [10] Im ba ñan e, Armej otemjej rej letok wain eo eṃṃan ṃokta; im ke eļap aer idaak, innām eo enana; a Kwar kōjparok wain eo eṃṃan ñan iien iṃ.
- [11] Men iṃ jinoin kakōļe ko An, Jijej ej kōṃṃane ilo Kena in Galili, im kwaļok An aibojoj; im ri kaļooran rej tōmak E.
- [12] Ālikin men iṃ Ej wanlaļtak ñan Kaperneum, E, im jinen, im ro jaten, im ro ri kaļooran: im rej pād ijo jab elōñ raan.
- [13] Im epaak kwōjkwōj in kijoone an ri Ju ro; im Jijej ej wanlōñļok ñan Jerusalem.
- [14] Im Ej lo ilowan tempel ro rej wiakake kau koṃaan im jiiip ko im ṃuļe ko, im ro rej wia kōn ṃAn rej jiijet.
- [15] Im ke eṃōj An kōṃanṃan kein deñļok kool, Ej kadiwōjļok er otemjej jān tempel, im jiiip ko, im kau koṃaan ko; im lutōkļok ṃAn an ri wia kōn ṃAn, im ukōji tebōļ ko aer;
- [16] Im E ba ñan ro rej wiakake ṃuļe ko, Koṃwin bōkļok men kā jān ije; koṃwin jab kōṃṃan iṃōn Jema iṃōn wia.
- [17] Im ri kaļooran rej keememej bwe ar je, Kijejeto kōn ṃweo iṃōṃ e naaj kañ Eō.
- [18] Innām ri Ju ro re uwaak im ba ñan E, Ta kakōļe eo Kwōj kwaļok ñan kōm bwe Kwōj kōṃṃan men kein?
- [19] Jijej e uwaak im ba ñan er, Koṃwin koṃkure tempel iṃ, im iuṃwin jilu raan I naaj kejerkak e.
- [20] Innām ri Ju ro re ba, Tempel iṃ raar kōṃṃane iuṃwin eñoul im jiljino iiō, im Kwō naaj kejerkak e iuṃwin jilu raan ke?
- [21] A E ar kōnono kōn tempel eo ānbwinnen.
- [22] Innām ke eṃōj An jerkakpeje jān ro re mej, ri kaļooran rej keememej E ar ba men iṃ: im rej tōmak Jeje ko, im naan eo Jijej e ar ba kake.
- [23] Im ke Ej pād i Jerusalem ilo kwōjkwōj in kijoone, ilo raan in kwōjkwōj elōñ rej lōke Etan, ke rej lo kakōļe ko E ar kōṃṃAn.
- [24] A Jijej e jab make lōke E ñan er, bwe E jeļā armej otemjej,

[25] Im ejjelok An aikuj bwe armej en konnaan kon armej; bwe E jelā men eo ilowan armej.

JEPTA 3

[Jn 3.1] Im juon armej iaan Parisi ro, etan Nikodimōs, Irooj in ri Ju ro:

- [2] E in e ar itok ñan E ilo boñ im ba ñan E, Rabbai, kōm jelā bwe Kwe ri Kaki itok jān Anij: bwe ejjelok armej ej maroñ in kōmanman kakōlle ko kwōj kōmman Ejañne Anij e jab pād ippān.
- [3] Jijej e uwaak im ba ñan e, Eṃool, eṃool, Ij ba ñan eok, Ejañne armej e jab bar lotak, e jāmin lo aelōñ in Anij.
- [4] Nikodimōs e ba ñan E, Ekōjkan armej e maroñ lotak ñe e rūtto? e maroñ bar deļoñ ilowan lojien jinen, im bar lotak ke?
- [5] Jijej e uwaak, Eṃool, eṃool, Ij ba ñan eok, Ejañne armej e jab lotak jān dān im Jetōb, e jab maroñ deļoñ ilo aelōñ in Anij.
- [6] Men eo ej lotak jān kanniōk e kanniōk, im men eo ej lotak jān Jetōb e jetōb.
- [7] Kwōn jab bwilōñ bwe Ij ba ñan eok, Eṃman komwin bar lotak.
- [8] Kōto ej ukwi ijo e kōnaan, im kwōj roñ an tōñetōñ, a kwō jaje kake ijo ej itok ie tok, im ijo ej ilok ie lok; āindein ro otemjej rej lotak jān Jetōb.
- [9] Nikodimōs ej uwaak im ba ñan E, Ekōjkan an maroñ men kein?
- [10] Jijej e uwaak im ba ñan e, Kwe ri kaki in Israel, im jab jelā men kein ke?
- [11] Eṃool, eṃool, Ij ba ñan eok, Kōmij kōnono men eo kōm jelā, im konnaan men eo kōm ar loe, im kom jab bōk am konnaan.
- [12] Ejañne I ar kwaļok ñan kom men ko an laļ, im kom jab tōmak, ekōjkan ami tōmak, ejañne Ij kwaļok ñan kom men ko an lañ.
- [13] Im ejjelok armej e ar wanlōñlok ñan lañ, a Eo e ar wanlaļtak jān lañ, Nejin armej Ej ilo lañ.
- [14] Im āinwōt Moses e ar lelōñlok jedpānit eo ilo āne jemaden, āindein naaj lelōñlok Nejin armej:
- [15] Bwe jabdewōt eo ej tōmak ilo E en mour indeeo.
- [16] Bwe kōn an Anij yokwe laļ, E ar letok juon wōt Nejin E ar keotak, bwe jabdewōt eo ej lōke E en jab jako, a en mour indeeo.
- [17] Bwe Anij e ar jab jilkintok Nejin ñan laļ bwe En ekajet laļ, a bwe laļ en mour kōn E.
- [18] Jab ekajet eo ej lōke E; a eṃōj ekajet eo e jab lōke E, bwe e ar jab lōke etan juon wōt Nejin Anij e ar keotak.
- [19] Im men in ekajet eo, bwe meram e moottok ñan laļ, im armej rej yokwe marok eļap jān meram, bwe jermal ko aer renana.
- [20] Bwe jabdewōt eo ej kōmanman nana ej kōjdate meram, im e jab itok ñan meram ñe ab kauwe jermal ko an.
- [21] A eo ej kōmanman ṃool, ej itok ñan meram, bwe en alikkar jermal ko an, bwe ar kōmman ilo Anij.

- [22] Ālikin men kein Jijej im ro ri kaḷooran rej itok ñan āne Judia; im Ej pād ijo, im peptaij.
- [23] Im barāinwōt Jon ej peptaij ilo Inon epaak Selim, bwe eḷap dān ijo: im rej itok im peptaij.
- [24] Bwe jañin joḷok Jon ṇa ilowan prisōn.
- [25] Innām e waḷok juon akwāāl ippān ro ri kaḷooran Jon im juon ri Ju kōn karreo.
- [26] Im rej itok ñan Jon, im ba ñan e, Rabbai, Eo e ar pād ippam i reear in Jordan, Eo kwōj kōnnaan kake, lo, E in ej peptaij, im armej otemjej rej ilok ñan ippān.
- [27] Jon ej uwaak im ba, Armej e jab maroñ in bōk jabdewōt, eḷañne ar jab leḷok ñan e jān lañ.
- [28] Kom make kōnnaan kōn eō, bwe I ar ba, I jab ri Kūrai, a bwe jilkintok eō mōkta jān E.
- [29] Eo ippān lio ej ḷeo pāleen; a jeran ḷeo, eo e jutak im roñjake, eḷap an lañlōñ kōn ainikien ḷeo: innām eñin aō lañlōñ e obrak.
- [30] E naaj ḷapḷok, a ña I naaj dikḷok.
- [31] Eo ej itok jān lañ E utiej jān otemjej: eo e jān laḷ e ri laḷ, im ej kōnono kōn laḷ: Eo ej itok jān lañ E utiej jān otemjej.
- [32] Im men eo e ar loe im roñjake, men in Ej kōnnaan kake, im ejjeḷok armej ej bōk An kōnnaan.
- [33] Eo e ar bōk An kōnnaan, ej sil men in bwe Anij eṇool.
- [34] Bwe Eo Anij e ar jilkintok Ej kōnono naan ko an Anij: bwe Anij e jab letok Jetōb ñan E kōn joñak.
- [35] Jeman ej yokwe Nejin, im E ar letok men otemjej ilo pein.
- [36] Eo ej lōke Nejin, mour indeeo an: im eo e jab lōke Nejin e jāmin lo mour: a illu an Anij ej pād ion.

JEPTA 4

- [Jn 4.1] Innām ke Irooj e jeḷā ekōjkan Parisi ro raar roñ bwe Jijej ej kōmman im peptaij elōñ ri kaḷooran jān Jon,
- [2] (Meñe Jijej e make jab peptaij, a ro ri kaḷooran)
- [3] Ej ilok jān Judia, im bar ilok ñan Galili.
- [4] Im eṇman En deblōk Sameria.
- [5] Innām Ej itok ñan jikin kwelok i Sameria, etan Saikar, epaak bukwōn eo Jekōb e ar leḷok ñan Josep nejin.
- [6] Im aebōj an Jekōb ej pād ie. Innām Jijej bwe Ej mōk kōn An etetal, Ej jijet iturin aebōj eo: im enañin joñoul im ruo awa.
- [7] Juon kōrā in Sameria ej itok bwe en itōk: Jijej ej ba ñan e, Kwōn letok ñan Eō bwe In idaak.
- [8] Bwe ri kaḷooran raar ilok ñan jikin kwelok eo bwe ren wiaik mōñā.
- [9] Innām kōrā in Sameria eo e ba ñan E, Etkē Kwe ri Ju kwōj kajjitōk dān in idaak jān eō, ña kōrā in Sameria? (Bwe ri Ju ro im ro ri Sameria re jab kōmṇao ippān doon.)

- [10] Jijej e uwaak im ba ñan e, Eļañņe Kwar jeļā men eo Anij ej letok, im Eo ej ba ñan eok, Kwōn letok ñan Eō bwe In idaak; kwō naaj kar kajjitōk ippān, im E naaj kar lewōj ñan eok dān in mour.
- [11] Kōrā eo e ba ñan E, Irooj, ejjeļok kein itōk ippaṃ, im aebōj iṃ e ṃwilal; innām jān ia Aṃ dān in mour?
- [12] Kwe eļap jān jemed Jekōb, eo e ar letok ñan kōm aebōj iṃ, im e make idaak, im ro nejnin im kidu ko an ke?
- [13] Jijej e uwaak im ba ñan e, Ro otemjej rej idaak dān iṃ re naaj bar maro.
- [14] A jabdewōt eo ej idaak dān eo I naaj leļok ñan e, e jāmin bar maro indeeo: a dān eo I naaj leļok ñan e, e naaj aebōj ilo e im naaj tṃortok ñan mour indeeo.
- [15] Kōrā e ba ñan E, Irooj, kwōn letok dān iṃ ñan eō, bwe in jab maro, im jab iten itōk ijin.
- [16] Jijej ej ba ñan e, Kwōn ilem kūrtoṃ jeo pāliom, im itok ijin.
- [17] Kōrā e uwaak im ba, Ejjeļok jeo pāleō. Jijej e ba ñan e, Eṃool aṃ ba, Ejjeļok jeo pāleō:
- [18] Bwe kar ļalem jeo pāliom; im eo ej pād ippaṃ kiiō e jab jeo pāliom; ilo men in eṃool aṃ ba.
- [19] Kōrā ej ba ñan E, Irooj, ij kab kile Kwe ri kanaan.
- [20] Ro jemem raar kabuñ ion toļ iṃ; im kom ba, Ilo Jerusalem ijo armej ren kabuñ ie.
- [21] Jijej ej ba ñan e, Kōrā, kwōn tōmak Eō, awa ej itok, ñe kom jāmin kabuñ ñan Jememi ion toļ iṃ, ak ilo Jerusalem.
- [22] Komij kabuñ ñan men eo kom jaje kake: kōm jeļā eo kōmij kabuñ ñan e, bwe mour jān ri Ju ro.
- [23] Awa ej itok, im kiiō, ñe ri kabuñ reṃool re naaj kabuñ ñan Jemeir ilo Jetōb im ilo ṃool: bwe Jemeir ej pukot ro āierwōt bwe ren kabuñ ñan E.
- [24] Anij e Jetōb: im ro rej kabuñ ñan E, ren kabuñ ilo Jetōb im ilo ṃool.
- [25] Kōrā e ba ñan E, I jeļā bwe Messaia ej itok, (eo etan Kūraj): ñe Ej itok, E naaj kwaļok men otemjej ñan kōm.
- [26] Jijej e ba ñan e, Ņa E, Ņa Ij kōnono ñan eok.
- [27] Im ilo iien iṃ ri kaļooran rej itok, im bwilōñ bwe Ej kōnono ippān kōrā; a ejjeļok armej e ba, Ta eo Kwōj pukot? ak, Etke Kwōj kōnono ippān?
- [28] Innām kōrā eo ej likūt kein itōk, im ej ilok ñan jikin kwelok, im ba ñan armej raṃ.
- [29] Komwin itok, im lo armej eo e ar kwaļok ñan eō men otemjej I ar kōṃṃAn: e maroñ bwe E iṃ ri Kūraj ke?
- [30] Innām rej ilok jān jikin kwelok, im itok ñan ippān.
- [31] Im ilukwōn iien iṃ, ri kaļooran rej kajjitōk ippān, im ba, Rabbai, Kwōn ṃōñā.
- [32] A E ba ñan er, Kijiō bwe In ṃōñā, men eo kom jaje kake.
- [33] Kōn men in, ri kaļooran re ba ñan doon, Jabdewōt armej e ar bōktok ñan E bwe En ṃōñā ke?
- [34] Jijej ej ba ñan er, Kijiō bwe in kōṃanṃan ankilaan Eo e ar jilkintok Eō, im bwe In kaṃōj]lok jermal eo An.

- [35] Kom jab ba ke, Ñe emãñ allõñ, innãm iien madmõd? lo, Ij ba ñan kom, Komwin reiļok, im lale jikin kallib ko; bwe kiiõ remouj ilo iien madmõd.
- [36] Im eo ej madmõd ej bõk oñãñ, im ej ãintok leen ñan mour indeeo: bwe eo ej jeor im eo ej madmõd ren jimor lañlõñ.
- [37] Bwe ilo men in emool naan eo, Juon ej jeor, im bar juon ej madmõd.
- [38] I ar jilkinļok kom bwe komwin madmõd ijo kom ar jab jermal ie: bar jet raar jermal, im komij deļoñ ilo aer jermal.
- [39] Im elõñ iaan ro ri Sameria ilo jikin kwelok eo rej tõmak E kõn naan an kõrã, eo e ar kõnnaan, E ar kwaļok ñan eõ men otemjej I ar kõmmAn.
- [40] Innãm ke ri Sameria rej itok, rej akweļap ñan E bwe En pãd ippaer: im Ej pãd ijo iumwin ruo raan.
- [41] Im bar elõñ rej tõmak kõn An in naan;
- [42] Im re ba ñan kõrã eo, Kiiõ kõm tõmak, jab kõn aṃ kõnono; bwe kõm ar make roñjake, im jeļã bwe emool E in Ri Lomõoren laļ.
- [43] Im ilokõn ruo raan Ej ilok jãñ ijo, im ilok ñan Galili.
- [44] Bwe Jijej e make kõnnaan, bwe ejjeļok naan in nõbar ri kanaan ilo ãne eo an.
- [45] Innãm ke Ej itok ñan Galili, ri Galili rej bõk E, bwe raar lo men otemjej E ar kõmmAn i Jerusalem ilo kwõjkwõj: bwe barãinwõt raar ilok ñan kwõjkwõj.
- [46] Innãm Jijej ej bar itok ñan Kena in Galili, ijo E ar kõmmAn dãn erom wain. Im juon irooj ej pãd ijo, nejin emmaan e nañinmej i Kaperneum.
- [47] Ke ej roñ bwe Jijej e ar itok jãn Judia ñan Galili, ej ilok ñan ippãn, im akweļap ñan E bwe En wanlaļtak im kemour nejin, bwe e nañinmej wõt jidik.
- [48] Innãm Jijej ej ba ñan e, Eļãñne kom jab lo kakõļle ko im men in bwilõñ ko, kom jãmin tõmak.
- [49] Irooj e ba ñan E, Irooj, kwõn wanlaļtak mokta jãn an nejiõ mej.
- [50] Jijej ej ba ñan e, Kwõn ilok, nejõm emour. Im armej ej tõmak naan eo Jijej e ar ba ñan e, im ej ilok.
- [51] Im ke ej wanlaļ, ri korijeran rej ioon e, im kõnnaanõk e, im ba, Nejõm emour.
- [52] Innãm ej kajjitõk ippaer, Jete awa e jino an mourļok? Im re ba ñan e, Inne ke juon awa nañinmej in bwil ejako jãn e.
- [53] Innãm jemen e jeļã, bwe ilo awa eo, iien eo Jijej e ar ba ñan e, Nejõm emour: im e make tõmak kab nukwin otemjej.
- [54] Eñin bar kein ka ruo kakõļle Jijej ej kõmmane, ke Ej itok jãn Judia ñan Galili.

JEPTA 5

- [Jn 5.1] ãlikin men kein juon kwõjkwõj an ri Ju ro; im Jijej ej wanlõñļok ñan Jerusalem.
- [2] Im ilo Jerusalem epaak aor in jiiip juon lwe, rej likūt etan ilo naan in Hibru Betesda, ļalem an portiko.
- [3] Ilo er elõñ armej iaan ro re mõjṃo, im re pilo, im re kūrro, im re akã rej babu.
- [5] Im juon armej ej pãd ijo, e ar nañinmej iumwin jilñuul im ruwalitõk iiõ.
- [6] Ke Jijej ej lo an babu, im kile bwe eto an pãd im ãinwõt, Ej ba ñan e, Kwõ kõṃnaan bwe kwõn mour ke?

- [7] L̥eo e nañinmej ej uwaak E, Irooj, ejjel̥ok armej ippa, ñe d̥an limaajñoño, bwe en likūt eō ilowan lwe: a ñe ij deļoñ, bar juon ej tuwaak mokta j̥an eō.
- [8] Jijej ej ba ñan e, Kwōn jerkak, im bōk kiniōm̥ im etal.
- [9] Im eṃōkaj an armej eo mour, im bōk kinien, im etal: im raan eo raan in Jabōt.
- [10] Innām ri Ju ro re ba ñan eo e kar mour, Rainin Jabōt: im e jab mālim bwe kwōn bōk kiniōm̥.
- [11] A ej uwaak, Eo e ar kemour eō, E iñ e ar ba ñan eō, Kwōn bōk kiniōm̥ im etal.
- [12] Innām rej kajjitōk ippān, Wōn armej eo e ar ba ñan eok, Kwōn bōk kiniōm̥ im etal?
- [13] A l̥eo e ar mour e jaje wōn eo: bwe Jijej e ar make ļok j̥an ijo, im elōñ armej rej pād ie.
- [14] Tokālik Jijej ej loe ilowan tempel, im E ba ñan e, Lo, kwōj mour wōt: kwōn jab bar kōm̥anm̥an nana, ñe ab ļapļok an nana itok ñan eok.
- [15] Armej eo ej ilok, im kōnnaanōk ri Ju ro, bwe Jijej eo E ar kemour e.
- [16] Im kōn men eo ri Ju ro rej matōtōre Jijej, bwe E ar kōm̥man men kein ilo Jabōt.
- [17] A Jijej e uwaak er, Jema ej jermal ñan iien iñ, im Ņa Ij jermal.
- [18] Innām kōn men iñ ri Ju ro eļapļok aer pukot bwe ren m̥an E, bwe E ar jab kōkkure wōt raan Jabōt, a barāinwōt Ej ba Anij e Jemen, im make kōm̥man E āinwōt Anij.
- [19] Innām Jijej e uwaak im ba ñan er, Eṃool, eṃool, Ij ba ñan kom, Nejin e jab make maroñ kōm̥anm̥an jabdewōt, a men eo Ej lo Jemen kōm̥mane; bwe men ko jabdewōt Ej kōm̥m̥An, men kein barāinwōt Nejin ej kōm̥m̥An āindein.
- [20] Bwe Jemen ej yokwe Nejin, im kwaļok ñan E men otemjej Ej make kōm̥manAn: im E naaj kwaļok ñan E jermal ko reļap j̥an men kein, bwe komwin bwilōñ.
- [21] Bwe āinwōt Jemen ej kajerkakpeje ro re mej, im kemour er; āindein barāinwōt Nejin e naaj kemour eo E kōṇaan.
- [22] Bwe Jemen e jab ekajet armej, a Ej likūt ekajet otemjej ñan Nejin:
- [23] Bwe armej otemjej ren koutiej Nejin, āinwōt rej koutiej Jemen. Eo e jab koutiej Nejin, e jab koutiej Jemen eo E ar jilkintok.
- [24] Eṃool, eṃool, Ij ba ñan kom, Eo ej roñjake Aō in naan, im lōke Eo e ar jilkintok Eō, an mour indeeo, im e jāmin itok ilo ekajet; a e ar ilok j̥an mej ñan lowaan mour.
- [25] Eṃool, eṃool, Ij ba ñan kom, Awa ej itok, im e moottok, ñe ro re mej re naaj roñ ainikien Nejin Anij: im ro rej roñjake re naaj mour.
- [26] Bwe āinwōt an Jemen mour ej ilo E, āindein barāinwōt E ar leļok ñan Nejin bwe an mour en ilo E:
- [27] Bwe E ar leļok kajoor ñan E bwe En kōm̥anm̥an ekajet, bwe E nejin armej.
- [28] Komwin jab bwilōñ kōn men iñ; bwe awa ej itok, ilo eo ro otemjej rej pād ilo lōb ko, re naaj roñ ainikien,
- [29] Im naaj diwōjtok; ro raar kōm̥man eṃman, ñan jerkakpeje in mour: im ro raar kōm̥anm̥an nana, ñan jerkakpeje in ekajet.

- [30] I jab make maroñ in kōmanman men eo jabdewōt: ãinwōt Ij roñ Ij ekajete; im Aō ekajet e wānōk: bwe I jab pukot ankil Aō wōt, a ankilaan Jema eo E ar jilkintok Eō.
- [31] Eļañne Ña Ij make kōnnaan kōn Eō, Aō kōnnaan e jab mool.
- [32] Bar juon Ej kōnnaan kōn Eō; im I jeļã bwe kōnnaan eo Ej kōnnaan kōn Eō emool.
- [33] Kom ar jilkinļok ñan Jon, im e ar kōnnaan kōn mool.
- [34] A kōnnaan Ij bōke e jab jãn armej: a Ij kōnono men kein bwe komwin mour.
- [35] E ar ļaam eo ej urur im romaak; im ewor iien kom ar kōnaan lañlõñ ilo an meram.
- [36] A ewor kōnnaan kōn Eō eļap jãn eo an Jon, bwe jermal ko Jema e ar letok ñan Eō bwe In kamōjļok er, jermal kein Ij kōmman, rej kōnnaan kōn Eō, bwe Jema e ar jilkintok Eō.
- [37] Im Jema eo E ar jilkintok Eō, E ar kōnnaan kōn Eō. Kom ar jab roñ ainikien, ak lo wāween jabdewōt iien.
- [38] Im naan eo An e jab pād ilo kom; bwe Eo E ar jilkintok E, kom jab tōmak E.
- [39] Komij pukot ilo Jeje ko, bwe ilo er komij ļomnak ami mour indeeo; im kein rej kōnnaan kōn Eō.
- [40] Im kom jab kōnaan itok ñan ippa, bwe komwin bōk mour.
- [41] I jab bōk nōbar jãn armej raņ.
- [42] A I jeļã kom, bwe yokwe Anij e jab pād ilo kom.
- [43] Ij itok ilo etan Jema, im kom jab bōk Eō: eļañne bar juon e naaj itok ilo etan make, kom naaj bōk e.
- [44] Ekōjkan ami maroñ in tōmak, komij bōk nōbar jãn doon, im jab pukot nōbar jãn Anij E wōt.
- [45] Komwin jab ļomnak bwe I naaj kinaakļok kom ñan Jema: juon ej kinaakļok kom, Moses eo komij kōjatdikdik kom kake.
- [46] Bwe eļañne kom ar tōmak Moses, kom naaj kar tōmak Eō, bwe e ar jeje kōn Eō.
- [47] A eļañne kom jab tōmak jeje ko an, ekōjkan ami naaj tōmak naan ko Aō?

JEPTA 6

- [Jn 6.1] Ālikin men kein, Jijej ej ilok ñan loᵛalo jab uweo, loᵛalo in Galili, bar juon etan Taibiriōs.
- [2] Im eļap jar rej ļoor E, bwe raar lo kakōļle ko An E ar kōmman ñan ro raar nañinmej.
- [3] Im Jijej ej wanlõñļok ioon toļ, im jijet ijo ippān ro ri kaļooran.
- [4] Im epaak kwōjkwōj in kijoone, kwōjkwōj an ri Ju ro.
- [5] Im ke Jijej ej reiļok, im lo eļap jar rej itok ñan E, E ba ñan Pilip, Je naaj wiaik bred jãn ia, bwe rein ren mōñã?
- [6] Im E ba men in bwe En mālejjoñ e: bwe E make jeļã men eo E naaj kōmmane.
- [7] Pilip e uwaak E, Rūbukwi silliñ kōn wia bred e jab bwe kōn er, bwe jabdewōt iaer en bōk jidik.
- [8] Juon iaan ri kaļooran, Andru jaten Saimōn Piter, e ba ñan E,

- [9] Juon ļadik ijin, ļalem ioon bred barli ippān, im ruo ek; a ewi tokjān men kein ippān elōñ armej?
- [10] Jijej e ba, Komwin kajijet armej raņ. Im elōñ wūjooj ijo. Innām armej rej jijet, bwinier nañin ļalem tōujin.
- [11] Im Jijej ej bōk ioon bred ko; im ke eņōj An jar, Ej ajeļ ñan ro rej jijet: im barāinwōt ek ko āinwōt aer kōņaki.
- [12] Ke re mat, E ba ñan ro ri kaļooran, Komwin aini mōttan ko mātiir, bwe ejjeļok iaer en jako.
- [13] Innām rej aini, im rej kalōñ joñoul im ruo iep kōn mōttan ko mātiir jān ļalem ioon bred barli, rej pād wōt ippaer mōjen aer mōñā.
- [14] Im armej raņ ke raar lo kakōļle eo Jijej e ar kōmmane, re ba, Eņool E iņ ri kanaan eo ej itok ñan laļ.
- [15] Innām ke Jijej e jeļā, bwe re kōņaan itok im bōk E kōn kajoor, im kōmman bwe En kiñ, E bar make ilok ñan toļ.
- [16] Im ke ejota, ro ri kaļooran rej wanlaļ ñan loļaļo,
- [17] Im uwe ioon wa, im rej ilok ioon loļaļo ñan Kaperneum. Im iien iņ e marok, im Jijej e jañin itok ñan ippaer.
- [18] Im epoktak loļaļo kōn an ļap kōto ej ukwi.
- [19] Innām ke eņōj aer aōnōnļok roñoul im ļalem ak jilñuul fōrloñ, rej lo Jijej etetal ioon loļaļo, im kepaak wa: im rej lōļņoñ.
- [20] A E ba ñan er, Ņa E; komwin jab lōļņoñ.
- [21] Innām re kōņaan bōk E ioon wa; im eņōkaj an wa tōkeak i āne rej ilok ñan e.
- [22] Raan eo ilju, ke armej, ro raar jutak ioon āne i reear in loļaļo, rej lo ejjeļok bar juon wa ijo, a juon wōt, im Jijej e ar jab uwe ippān ro ri kaļooran ioon wa e, a ri kaļooran raar make uwe;
- [23] (A bar jet wa raar tartok jān Taibiriōs epaak āne ijo raar mōñā bred, ke eņōj an Jijej jar.)
- [24] Innām ke armej rej lo bwe Jijej e jab pād ijo, im jab ro ri kaļooran; rej barāinwōt uwe ioon wa ko, im itok ñan Kaperneum, im pukot Jijej.
- [25] Im ke eņōj aer lo E i loļaļo jab uweo, re ba ñan E, Rabbai, Kwar itok ñan ijin ñāāt?
- [26] Jijej e uwaak er im ba, Eņool, eņool, Ij ba ñan kom, Komij pukot Eō, jab bwe kom ar lo kakōļle ko, a bwe kom ar mōñā ioon bred ko im ar mat.
- [27] Komwin jab jermal kōn mōñā eo ej jako, a kōn mōñā e naaj pād wōt ñan mour indeeo, men eo Nejin armej E naaj lewōj ñan kom; bwe Anij Jema E ar sil E.
- [28] Innām re ba ñan E, Ta eo kōmin jermal kake, bwe kōmin jerbale jermal ko an Anij?
- [29] Jijej e uwaak im ba ñan er, Men iņ jermal an Anij, bwe komwin lōke Eo E ar jilkintok.
- [30] Innām re ba ñan E, Innām ta kakōļle eo Kwōj kwaļok e, bwe kōmin lo, im tōmak Eok? ta eo Kwōj jerbale?
- [31] Ro jimmad raar mōñā manna i āne jemaden; āinwōt ar je, E ar leļok ñan er bred jān lañ bwe ren mōñā.

- [32] Innām Jijej ej ba ñan er, Eṃool, eṃool, Ij ba ñan kom, E jab Moses e ar lewōj ñan kom bred jān lañ: a Jema ej lewōj ñan kom bred eṃool jān lañ.
- [33] Bwe bred an Anij Eo ej itok jān lañ, im leļok mour ñan laļ.
- [34] Innām re ba ñan E, Irooj, iien otemjej, Kwōn letok bred iñ ñan kōm.
- [35] Im Jijej ej ba ñan er, Ña bred in mour; eo ej itok ñan Eō ejāmin kwōle; im eo ej lōke Eō e jāmin maro indeeo.
- [36] A I ar ba ñan kom, Kom ar lo Eō im kom jab tōmak.
- [37] Ro otemjej Jema e ar letok ñan Eō, re naaj itok ñan ippa; im eo ej itok ñan Eō, e pen Aō jāmin joļok e.
- [38] Bwe I ar itok jān lañ, jab bwe In kōṃanṃan ankil Aō, a ankilaan Eo e ar jilkintok Eō.
- [39] Im men in ankilaan Jema, e ar jilkintok Eō, bwe iaan ro otemjej E ar letok ñan Eō ejjeļok juon en jako, a I naaj kajerkekpeje eo ilo raan eo āliktata.
- [40] Im men in ankilaan Eo e ar jilkintok Eō, bwe er otemjej rej lo Nejin, im lōke E, ren bōk mour indeeo: im I naaj kejerkek e ilo raan eo āliktata.
- [41] Innām ri Ju ro rej lotaan E, bwe E ar ba, Ña bred eo ej wanlaļtak jān lañ.
- [42] Im re ba, E iñ E jab Jijej, nejin Josep, je jeļā jemen im jinen ke? a ekōjkan An ba kiiō, I ar wanlaļtak jān lañ?
- [43] Jijej e uwaak im ba ñan er, Komwin jab lotaan ippān doon.
- [44] Ejjeļok armej ej maroñ itok ñan ippa eļañne Jema eo E ar jilkintok Eō E jab ipertok e: im I naaj kejerkake ilo raan eo āliktata.
- [45] Ro ri kanaan raar je, Im Anij e naaj katakin er otemjej. Ro otemjej raar roñ jān Jema, im ar katak, rej itok ñan Eō.
- [46] Ejjeļok juon armej e ar lo Jema, a Eo wōt jān Anij, E ar lo Jema.
- [47] Eṃool, eṃool, Ij ba ñan kom, Eo ej tōmak, mour indeeo ippān.
- [48] Ña bred eo, bred in mour.
- [49] Ro jememi raar ṃōñā manna ilo āne jemaden, im re mej.
- [50] Bred iñ ej itok jān lañ, bwe armej en ṃōñā jān e im jāmin mej.
- [51] Ña bred eo emour e ar wanlaļtak jān lañ. Eļañne jabdewōt armej ej ṃōñā jān bred iñ, e naaj mour indeeo; aet, im bred eo I naaj lewōj e kanniōkiō, men eo I naaj lewōj bwe en kemour laļ.
- [52] Innām ri Ju ro rej akwāāl ippān doon, im ba, Ekōjkan armej iñ E maroñ letok ñan kōj kanniōkin bwe jān ṃōñā?
- [53] Innām Jijej e ba ñan er, Eṃool, eṃool, Ij ba ñan kom, Eļañne kom jab ṃōñā kanniōkin Nejin armej, im jab idaaḱ bōtōktōkin, ejjeļok mour ilo kom.
- [54] Eo ej ṃōñā kanniōkiō, im idaaḱ bōtōktōkiō, an mour indeeo; im I naaj kejerkek e ilo raan eo āliktata.
- [55] Bwe kanniōkiō men in ṃōñā eṃool, im bōtōktōkiō men in idaaḱ eṃool.
- [56] Eo ej ṃōñā kanniōkiō, im idaaḱ bōtōktōkiō, ej pād ilo Ña, im Ña ilo e.
- [57] Āinwōt Jema emour E ar jilkintok Eō, im Ña Ij mour kōn Jema: barāinwōt eo ej ṃōñā Ña, e iñ e naaj mour kōn Ña.

- [58] Men in bred eo e ar wanlaʔtak jãn lañ: jab ãinwõt ro jememi raar mōñã im re mej; eo ej mōñã bred in e naaj mour indeeo.
- [59] Men kein E ar ba ilowan imõn kwelok, ke E ar katakin ilo Kaperneum.
- [60] Innãm elõn iaan ro ri kaʔooran, ke emõj aer roñjake, re ba, Naan in naan e pen; wõn e maroñ in roñjake?
- [61] Ke Jijej e make jeʔã bwe ri kaʔooran rej lotaan kõn men in, E ba ñan er, Men in ej lõkatipe kom ke?
- [62] Ekõjkan ejañne kom naaj lo an Nejin armej wanlõñʔok ñan ijo E ar pãd ie mokta?
- [63] Jetõb ej kemour; kanniõk ejjeʔok an kakajooror: naan ko I ar kõnono ñan kom kaki, rej Jetõb, im rej mour.
- [64] A jet iaami re jab tõmak. Bwe Jijej e jeʔã jãn jinoin, wõn ro re jab tõmak, im wõn eo e naaj ketak E.
- [65] Im E ba, Kõn men in I ar ba ñan kom, bwe ejjeʔok armej e maroñ itok ñan ippa, ejañne Jema e jab leʔok ñan e.
- [66] Jãn iien eo, elõn iaan ro ri kaʔooran rej jepʔaak, im jab bar etetal ippãn.
- [67] Innãm Jijej e ba ñan joñoul im ruo, Kom barãinwõt kõñaan ilok ke?
- [68] Saimõn Piter e uwaak E, Irooj, kõm naaj ilok ñan wõn? ippaṃ naan ko naan in mour indeeo.
- [69] Im kõm ar tõmak im jeʔã, bwe Kwe Juon eo Ekwõjarjar an Anij.
- [70] Jijej e uwaak er, I ar jab kããlõt kom joñoul im ruo, im juon iaami e tepiʔ ke?
- [71] Ej kõnono kõn Judas, nejin Saimõn Iskariõt, bwe e juon iaan joñoul im ruo, im e naaj ketak E.

JEPTA 7

- [Jn 7.1] Im ãlikin men kein Jijej ej etetal i Galili: bwe e jab kõñaan etetal i Judia, bwe ri Ju ro rej pukot bwe ren ṃan E.
- [2] Kiiõ epaak an ri Ju ro kwõjkwõj i imõn kõppãd.
- [3] Innãm ro jaten re ba ñan E, Kwõn ilok jãn ijin, im ilok ñan Judia, bwe barãinwõt ri kaʔooran ren lo jermal ko Aṃ Kwõj kõṃṃAn.
- [4] Bwe ejjeʔok armej ej kõṃṃan jabdewõt men eo ijo ettino, im e make kõñaan bwe en alikkar. Ejañne Kwõj kõṃṃan men kein, Kwõn kwaʔok Eok ñan laʔ.
- [5] Bwe ro jaten re jab lõke E.
- [6] Innãm Jijej e ba ñan er, Aõ iien e jañin itok: a iien eo ami e pojak iien otemjej.
- [7] Laʔ e jab maroñ kõjdate Eõ, bwe Ij kõnnaan kõn e, bwe jermal ko an renana.
- [8] Komwin ilok ñan kwõjkwõj in: I jab ilok ñan kwõjkwõj in kiiõ: bwe iien eo Aõ e jañin jejjjet.
- [9] Ke emõj An ba men kein ñan er, Ej pãd wõt i Galili.
- [10] A ke emõj an ro jaten ilok ñan kwõjkwõj eo, innãm E barãinwõt ilok, jab alikkar, a ãinwõt ilo ettino.
- [11] Innãm ri Ju ro rej pukot E ilo kwõjkwõj, im ba, Ewi ʔeo?
- [12] Im jar eo eʔap aer ñõrñõr ñan doon kõn E: bwe jet re ba, E armej emṃan: bar jet re ba, Jab; a Ej kejebwãbweik armej ran.

- [13] A ejjelɔk armej ej kōnono alikkar kōn E, bwe re mijak ri Ju ro.
- [14] Kiiō enañin ilukwōn kwōjkwōj Jijej ej wanlōñ ilowan tempel im katakin.
- [15] Innām ri Ju ro re bwilōñ im ba, Ekōjkan an armej in jelā letter ko, bwe E ar jab katak kaki?
- [16] Jijej e uwaak er, im ba, Naan in katak eo Aō, e jab Aō, a an Eo e ar jilkintok Eō.
- [17] Eļañne jabdewōt armej e kōṇaan kōṇanṇan ankilaan, e naaj jelā kōn naan in katak eo, eļañne e jān Anij, ak Ij kōnono kōn Ña wōt.
- [18] Eo ej kōnono jān e make ej kapukōt an aiboojoj: a eo ej kapukōt aiboojoj an Eo e ar jilkintok Eō, E in eṇool, im ejjelɔk jab wānōk ilo E.
- [19] Moses e ar lewōj kien ṇan kom ke, im ejjelɔk juon iaami ej pokake kien eo? Etke komij pukot in ṇan Eō?
- [20] Jar eo re uwaak im ba, Juon timoṇ ippaṇ; wōn eo ej pukot bwe en ṇan Eok?
- [21] Jijej e uwaak im ba ṇan er, I ar kōṇanṇan juon jermal, im kom otemjej bwilōñ kake.
- [22] Moses e ar lewōj ṇan kom ṇwijiṇwiji, (ak men eo e jab an Moses, a an ro jijiṇnad); im ilo raan in Jabōt komij ṇwijiṇwiji armej.
- [23] Eļañne armej ilo Jabōt ej bōk an ṇwijiṇwiji, bwe en jab kōkkure kien Moses; komij illu ṇan Eō bwe I ar kōṇanṇan juon armej mour otem mour ilo Jabōt ke?
- [24] Komwin jab ekajet kōn men eo ilikin, a komwin ekajete ekajet eo eṇool.
- [25] Innām jet iaer jān Jerusalem re ba, E in e jab Eo rej pukot bwe ren ṇan E ke?
- [26] Im, lo, Ej kōnono alikkar, im ejjelɔk aer ba ṇan E. E maroñ ke bwe irooj raṇ re kanooj kile bwe E in ri Kūraij?
- [27] A je jelā armej in ijo Ej itok jān e; a ñe ri Kūraij ej itok ejjelɔk armej ej jelā ijo ej itok jān e.
- [28] Innām Jijej ej laṇōj ilowan tempel ke Ej katakin, im ba, Kom jelā Ña, im kom jelā ijo Ij itok jān e: a Ña I jab itok kōn Ña, a Eo e ar jilkintok Eō eṇool, Eo kom jaje.
- [29] A Ña I jelā E; bwe Ña jān E, im E ar jilkintok Eō.
- [30] Innām rej pukot bwe ren jibwe E: a ejjelɔk armej ej likūt pein ṇa ioon, bwe awa eo An e jañin moottok.
- [31] Im elōñ iaan jar eo rej tōmak E, im ba, Ñe ri Kūraij ej itok, E naaj kōṇanṇan kakō]le ko elōñ jān men kein armej in Ej kōṇanṇan ke?
- [32] Parisi ro rej roñ bwe armej rej ñōñōr kake men kein kōn E, im Parisi ro im pris ro reļap rej jilkin]ok ri jelōk bwe ren jibwe E.
- [33] Innām Jijej e ba ṇan er, Jidik wōt iien Ij pād ippemi, im Ij ilok ṇan Eo e ar jilkintok Eō.
- [34] Kom naaj pukot Eō, im kom jaṇin lo Eō, bwe ijo Ij pād, kom jab maroñ in itok ie.
- [35] Innām ri Ju ro re ba ṇan doon, E naaj ilok ṇan ia, bwe kōmin jab lo E? E naaj ilok ṇan ro re jeplōklōk ippān ro ri Grik, im katakin ro ri Grik ke?
- [36] Naan ot naan in Ej ba, Kom naaj pukot Eō, im jāmin lo Eō; im ijo Ij pād, koon jab maroñ in itok ie?

- [37] Ilo raan eo āliktata, raan eɽap ilo kwōjkwōj, Jijej ej jutak im lamōj, im ba, eɽaññe jabdewōt armej ej maro, en itok ñan ippa, im idaak.
- [38] Eo ej lōke Ña, āinwōt Jeje ko rej ba, Jān ilowan e naaj tɔɔr ɽok reba ko an dān in mour.
- [39] A Ej kōnono men in kōn Jetōb, Eo ro rej lōke E re naaj bōke; bwe ar jañin letok Jetōb eo, bwe ar jañin kaiboojoj Jijej.
- [40] Innām elōñ armej, ke rej roñ naan in, re ba, Eṃool E in ri Kanaan eo.
- [41] Bar jet re ba, E in ri Kūraij. A bar jet re ba, Ri Kūraij ej itok jān Galili ke?
- [42] Jeje ko raar jab ba, bwe ri Kūraij ej itok jān ineen Devid, im jikin kwelok Betleem, ijo e ar pād ie ke?
- [43] Innām armej rej jepel jān doon kōn E.
- [44] Im jet iaer re kōṇaan jibwe E: a ejjelok armej ej likūt pein ioon.
- [45] Innām ri jelok raṇ rej itok ñan pris ro reɽap im Parisi ro: im re ba ñan er, Etko kom ar jab āñintok E?
- [46] Ri jelok rej uwaak, Ejjelok armej e ar kōnono āinwōt armej in.
- [47] Innām Parisi ro re uwaak er, Barāinwōt kom jebwābwe ke?
- [48] Jabdewōt iaan irooj raṇ, ak Parisi raṇ, e ar tōmak E ke?
- [49] A jar in re jaje kien, rej menukol.
- [50] Nikodimōs ej ba ñan er (eo e ar itok ñan E ilo boñ, e juon iaer),
- [51] Kien eo ar ej liaaklok armej mokta jān an roñ jān e, im jelā men eo ej kōmman ke?
- [52] Rej uwaak im ba ñan e, Kwe barāinwōt ri Galili ke? Kwōn pukot im lale, bwe ejjelok juon ri kanaan ej itok jān Galili.
- [53] Im armej otemjej rej ilok ñan mo ko imweir.

JEPTA 8

[Jn 8.1] Jijej ej ilok ñan toɽ Olivet.

- [2] Im ke e raantak E bar deɽoñ ilowan tempel, im armej otemjej rej itok ñan E, im Ej jijet im katakin er.
- [3] Im skraib ro im Parisi ro rej āñintok ñan e juon kōrā, ar jibwe ilo ɽoñ: im ñe eṃōj aer kajutak e eoɽp,
- [4] Re ba ñan E, Ri Kaki, kōrā in jibwe ilo ɽoñ, ilo an kōmanmane wōt.
- [5] Im Moses e ar jiroñ kōm ilo kien, bwe ren kade ro āinwōt: a ta eo Aṃ ba?
- [6] Rej ba men in bwe ren kapo E, bwe en wor men in kinaaklok E ippaer. A Jijej e jirlok, im jeje kōn addiin ioon bwidej.
- [7] Im ke rej kajjitōk makij ippān, Ej bōkarten im ba ñan er, Eo iaami ejjelok an jerowiwī, en kade mokta kōn juon dekā.
- [8] Im Ej bar jirlok im jeje ioon bwidej.
- [9] Im ke rej roñjake, rej ilok juon im juon, jino ippān eo e rūtto ñan eo āliktata; im Jijej e make pād wōt, im kōrā e jutak eoɽp ijo e ar pād ie.
- [10] Ke eṃōj an Jijej bōkarten im lo ejjelok armej a kōrā wōt, e ba ñan e, Kōrā, ewi ro raar kinaaklok eok? ejjelok juon e ar liaaklok eok ke?

- [11] E ba, Irooj, ejjelok. Im Jijej e ba ñan e, Im Ña I jab liaaklok eok: kwön ilok im jab bar jerowiwi.
- [12] Innām Jijej e bar kōnono ñan er, im ba, Ña, meram in laj: eo ej loor Eō e jāmin etal ilo marok, a e naaj an meram in mour.
- [13] Innām Parisi ro re ba ñan E, Kwōj kōnnaan kōn Kwe; Aṃ kōnnaan e jab mool.
- [14] Jijej e uwaak im ba ñan er, Im eļañne Ña Ij kōnnaan kōn Eō, eṃool Aō kōnnaan: bwe I jeļā ijo I ar itok jān e, im ewi Ij ilok ie lok; a kom jaje ewi Ij itok jān e, ak ilok ielok.
- [15] Kom ekajete kōn kanniok; I jab ekajet armej.
- [16] Im eļañne Ij ekajete, eṃool Aō ekajet: bwe Ña I jab make iaaō, a Ña im Jema eo e ar jilkintok Eō.
- [17] Aet im jeje ilo kiemi, kōnnaan an ruo armej eṃool.
- [18] Ña juon Ij kōnnaan kōn Eō, im Jema eo E ar jilkintok Eō, Ej kōnnaan kōn Eō.
- [19] Innām re ba ñan E, Ewi Jemaṃ? Jijej e uwaak, Kom jab jeļā Ña ak Jema: eļañne kom ar jeļā Ña, barāinwōt kom naaj kar jeļā Jema.
- [20] Jijej e ar kōnono naan kein ilowan imōn ṃAn ke Ej katakin ilowan tempel: im ejjelok armej ej likūt pein ion, bwe awa eo An e jañin itok.
- [21] Innām Jijej e bar ba ñan er, Ij ilok, im kom naaj pukot Eō, im kom naaj mej ilo jerowiwi ko ami; ijo Ij ilok ie lok, kom ban itok ie tok.
- [22] Innām ri Ju ro re ba, E naaj make ṃan E ke? bwe E ba, Ijo Ij ilok ie lok, kom ban itok ie tok.
- [23] Im E ba ñan er, Kom jān laj; Ña jān lañ: kom an laj in; Ña I jab an laj in.
- [24] Innām I ar ba ñan kom, bwe kom naaj mej ilo jerowiwi ko ami: bwe eļañne kom jab tōmak bwe Ña E, kom naaj mej ilo jerowiwi ko ami.
- [25] Innām re ba ñan E, Wōn Kwe? Im Jijej e ba ñan er, Ña eo I ar barāinwōt ba ñan kom jān jinoin.
- [26] Elōñ men ko ippa bwe In kōnono kaki, im ekajete kōn kom: a Eo e ar jilkintok Eō eṃool; im Ij kōnono ñan ro ri laj men ko I ar roñ jān E.
- [27] Re jab kile bwe E ar kōnono ñan er kōn Jeman.
- [28] Innām Jijej e ba ñan er, Ñe eṃōj ami lelōñlok Nejin armej, iien eo kom naaj jeļā bwe Ña E, im ejjelok Aō make kōṃanṃan; bwe āinwōt Jema e ar katakin Eō, men kein Ij kōnono.
- [29] Im Eo e ar jilkintok Eō, Ej pād ippa; Jema e ar jab likūt Eō make iaaō; bwe iien otemjej Ij kōṃanṃan men ko rej kabuñbūruen.
- [30] Ke Ej kōnono naan kein, elōñ rej tōmak E.
- [31] Innām Jijej ej ba ñan ri Ju ro rej tōmak E; Eļañne komij pād wōt ilo Aō in naan innām kom ri kaļoora reṃool,
- [32] Im kom naaj jeļā mool, im mool e naaj kōṃanṃan anemkwōjami.
- [33] Re uwaak E, Kōm ineen Ebream, im ejjelok iien kōm ar ri korijer ñan jabdewōt armej: ekōjkan Aṃ ba, Kom naaj anemkwōjami?
- [34] Jijej e uwaak er, eṃool; eṃool, Ij ba ñan kom, Jabdewōt eo ej kōṃanṃan jerowiwi, e ri korijeran jerowiwi.

- [35] Im ri korijer e jab pād ilo im indeeo: a Nejin ej pād indeeo.
- [36] Innām eļāñņe Nejin e naaj kōmānman anemkwōjami, kom naaj anemkwōjami wōt.
- [37] I jeļā bwe kom ineen Ebream; a komij pukot bwe komwin man Eō, bwe ejjeļok jikin Aō naan ilo kom.
- [38] Ij kōnono men ko I ar lo ippān Jema: im komij barāinwōt kōmānman men ko kom ar roņjake ippān jememi.
- [39] Re uwaak im ba ñan E, Ebream e jemem. Jijej e ba ñan er, Eļāñņe kom ro nejin Ebream, kom naaj kar kōmānman jermal ko an Ebream.
- [40] A kiiō komij pukot bwe komwin man Eō, armej Eo e ar kōnono ñan kom men in mool, men eo I ar roņ jān Anij: men in Ebream e ar jab kōmānmane.
- [41] Komij kōmānman jermal ko an jememi. Re ba ñan E, Kōm ar jab ļotak ilo ļōñ; juon wōt Jemem, Anij.
- [42] Jijej e ba ñan er, Eļāñņe Anij ej jememi, kom naaj kar yokwe Eō: bwe I ar waļoktok im itok jān Anij: I ar jab make itok, a E ar jilkintok Eō.
- [43] Etke kom jab meļeļe Aō kōnono? bwe kom jab maroņ roņ Aō in naan.
- [44] Kom jān jememi tepiļ eo, im mōm ko an jememi kom kōņaan kōmānman; e ri uror jān jinoin, im e jab jutak ilo mool, bwe ejjeļok mool ilo e. Ke ej kōnono riab, ej kōnono jān men ko an; bwe e ri riab, im jemen riab.
- [45] Abwe Ij ba ñan kom men eo emool, kom jab tōmak Eō.
- [46] Wōn iaami ej ņaruō kōn jerōwiwi? Im eļāñņe Ij kōnono mool, etke kom jab tōmak Eō?
- [47] Eo e jān Anij ej roņjake naan ko an Anij: kōn men in kom jab roņjake, bwe kom jab jān Anij.
- [48] Innām ri Ju ro re uwaak im ba ñan E, E jab emman ke am ba, Kwe ri Sameria, im juon timoņ ippam?
- [49] Jijej e uwaak, Ejjeļok timoņ ippa, a Ij wūjtake Jema, im komij kajekdoņ Eō.
- [50] A I jab pukot Aō aiboojoj: juon Eo ej pukot im ekajete.
- [51] Emool, emool, Ij ba ñan kom, eļāñņe armej ej pokake Aō in naan, e jāmin lo mej.
- [52] Innām ri Ju re ba ñan E, Kiiō kōm jeļā bwe timoņ ippam. Ebream e ar mej, im ri kanaan ro; im Kwōj ba Eļāñņe armej ej pokake Aō in naan, e jāmin edjoņ mej.
- [53] Kwe eļap jān jemed Ebream, eo e mej ke? im ri kanaan re mej; wōn Kwe ilo am make kōmman eok?
- [54] Jijej e uwaak, Eļāñņe Ij kaiboojoj Ņa, Aō aiboojoj jekdoņ: Jema ej kaiboojoj Eō: kōn Eo komij ba, E ami Anij.
- [55] Im kom ar jab jeļā E; a Ņa I jeļā E; im eļāñņe Ij ba, I jab jeļā E, I naaj ri riab āinwōt kom: a I jeļā E, im Ij pokake An in naan.
- [56] Jememi Ebream e ar lañlōñ bwe e naaj lo Aō raan: im e ar lo e im mōņōņō.
- [57] Innām ri Ju re ba ñan E, kiiō Kwō jañin rūtto ilo lemñoul iiō, im Kwar lo Ebream ke?
- [58] Jijej e ba ñan er, Emool, emool, Ij ba ñan kom, mokta jān Ebream Ij pād.
- [59] Innām rej kabwijere dekā bwe ren kad E: a Jijej ej tilekek, im ilok jān tempel.

JEPTA 9

[Jn 9.1] Im ke E ar kijoone, Ej lo juon armej epilo jān iien ļotak.

[2] Im ri kaļooran rej kajjitōk ippān, im ba, Rabbai, wōn e ar jerᵇwiwi, armej iņ, ak jeman im jinen, bwe e ar ļotak im pilo?

[3] Jijej e uwaak, armej iņ e ar jab jerᵇwiwi, ak jemen im jinen; a bwe jermal ko an Anij ren waļok kōn e.

[4] Emman In jerbale jermal ko an Eo e ar jilkintok Eō ke e raan: boņ ej itok ñe ejjelok armej ej maroņ in jermal.

[5] Ke Ij pād i laļ, Ij meram in laļ.

[6] Ke eņōj An kōnono āinwōt, E iyelok ioon bwidej, im iiōki bwidej kōn iādatōltōl, im ej kapit mejan armej eo e pilo kōn bwidej eo,

[7] Im ba ñan e, Kwōn ilok im kwaļ mejōm ilo lwe Siloam, (ukōtōn naan iņ, ar jilōkļok.) Innām ej ilok, im kwaļ, im itok im loļokjeņ.

[8] Innām ro ri turin, im ro raar lo e mōkta bwe e ar ri owar, re ba, E iņ e jab eo e ar jijet im uñnar ke?

[9] Jet re ba, E iņ eo; bar jet re ba, Jab, a ej āinwōt eo; a e ba, Ņa eo.

[10] Innām re ba ñan e, Ekōjkan mejōm repelļok?

[11] E uwaak im ba, Juon armej etan Jijej, e ar iiōki bwidej, im kapit meja, im ba ñan eō, Kwōn ilok ñan Siloam, im kwaļe: innām I ar ilok im kwaļe, im loļokjeņ.

[12] Im re ba ñan e, Ej pād ia? E ba, I jaje.

[13] Rej āñinļok eo e kar pilo mōkta ñan Parisi ro.

[14] Im raan eo, ke Jijej e ar iiōki bwidej im kapelļok mejan, raan Jabōt.

[15] Innām Parisi ro rej bar kajjitōk ippān, Ekōjkan aņ loļokjeņ? E ba ñan er, E ar likūt bwidej ņa ioon meja, im I ar kwaļe im loļokjeņ.

[16] Innām jet iaan Parisi ro re ba, Armej iņ e jab jān Anij, bwe E jab lale Jabōt. Bar jet re ba, Ekōjkan an armej ri jerᵇwiwi kōmanman kakōļle ko āinwōt iņ? Im re jepel jān doon.

[17] Re bar ba ñan ļeo e pilo, Ta eo aņ ba kōn E, bwe E ar kapelļok mejōm? Ej ba, E ri kanaan.

[18] A ri Ju ro re jab tōmak kōn e, bwe e kar pilo im ar loļokjeņ, ñan iien eo rej kūrtok jemen im jinen ļeo e ar loļokjeņ.

[19] Im rej kajjitōk ippaerro im ba, Ļe iņ nejimi eo kom ba e ar ļotak im pilo ke? Innām ekōjkan an loļokjeņ kiiō?

[20] Jemen im jinen re uwaak im ba, Kōmro jeļā bwe e nejim, im bwe e ar ļotak im pilo;

[21] A ekōjkan an loļokjeņ kiiō kōm jaje; ak wōn eo e ar kapelļok mejan kōm jaje: e rūtto, komwin kajjitōk ippān: e naaj make kōnono kōn e.

[22] Jemen im jinen re ba naan kein, bwe re mijak ri Ju ro: bwe eņōj an ri Ju ro pepe, Eļañne jabdewōt armej ej kwaļok bwe E ri Kūraiļ, re naaj joļok e jān iņmōn kwelok.

[23] Kōn men iņ jemen im jinen re ba, e rūtto; komwin kajjitōk ippān.

- [24] Innām re bar kūrtoke armej eo e kar pilo, im ba ñan e, Kwōn nōbar Anij: kōm jelā armej in E ri jerōwiwi.
- [25] E uwaak im ba, I jaje E ri jerōwiwi ke, jab ke: juon men in I jelā, bwe ke I kar pilo, kiiō ij loļokjeņ.
- [26] Innām re bar ba ñan e, ta eo E ar kōmanman ñan eok? ekōjkan An kapellok mejōm?
- [27] E uwaak er, E mōj aō kōnnaanōk kom ekkein, im kom ar jab roņjake; etke kom kōnaan bar roņjake? kom barāinwōt kōnaan bwe komwin ri kaļooran ke?
- [28] Im rej kajjirere kake, im ba Kwe ri kaļooran; a kōm ri kaļooran Moses.
- [29] Kōm jelā bwe Anij e ar kōnono ñan Moses; a kōn Le in, kōm jaje ijo e jān e.
- [30] Armej eo ej uwaak im ba ñan er, Ekwe men in juon men in bwilōñ, bwe kom jaje ijo E jān e, im E ar kapellok meja.
- [31] Je jelā bwe Anij e jab eōroñ ro ri jerōwiwi: a eļañne jabdewōt armej ej kabuñ ñan Anij, im kōmanman ankilaan, Ej eōroñ e.
- [32] Jān jinoin laļ ejjelok en e ar roñ bwe jabdewōt armej e ar kapellok mejan eo ej pilo ke e ar ļotak.
- [33] Eļañne armej in e jab jān Anij, e jab maroñ in kōmanman jabdewōt.
- [34] Re uwaak im ba ñan e, Kwar ļotak ilo jerōwiwi wōt, im kwōj katakin kōm ke? Im rej joļok e.
- [35] Jijej ej roñ bwe raar joļok e; im ke emōj An lo e, E ba ñan e, Kwōj lōke Nejin Anij ke?
- [36] E uwaak im ba, Irooj, wōn Eo bwe in lōke E?
- [37] Im Jijej e ba ñan e, Kwar lo E, im E eo ej kōnono ñan eok.
- [38] Im e ba, Irooj ij lōke Eok. Im ej kabuñ ñan E.
- [39] Im Jijej e ba, I ar itok ñan laļ in kōn ekajet, bwe ro re jab loļokjeņ ren loļokjeņ; im ro rej loļokjeņ ren pilo.
- [40] Ro iaan Parisi ro rej pād ippān rej roñ naan kein, im ba ñan E, Kōm barāinwōt pilo ke?
- [41] Jijej e ba ñan er, Eļañne kom pilo, ejjelok jerōwiwi ippemi; a kiiō komij ba, Kōm loļokjeņ; ami jerōwiwi ej pād wōt.

JEPTA 10

- [Jn 10.1] E mool, emool, Ij ba ñan kom, Eō e jab deļoñ ilo kōjām ilowan wōrwōr in jiiip, a ej uwelōñļok ilo bar juon ial, e in ri koot im ri rakimi.
- [2] A eo ej deļoñ ilo kōjām e seperd in jiiip ko.
- [3] Ri lale aor ej kapellok ñan e; im jiiip rej roņjake ainikien: im ej kūr jiiip ko an kōn etaer, im tōl ļok er.
- [4] Im ke ej kadiwōjļok jiiip ko an, ej ilok i maer ļok, im jiiip ko rej ļoore; bwe re jelā ainikien.
- [5] Im re jāmin ļoor eo ekāāl ñan er, a re naaj ko jān e; bwe re jaje ainikien ro ri ekāāl.
- [6] Būrabōļ in Jijej ej kōnono ñan er; a re jaje ta men ko Ej kōnono ñan er kaki.

- [7] Innām Jijej e bar ba ñan er, Eṃool, eṃool, Ij ba ñan kom, Ña aor in jiiip ko.
- [8] Ro otemjej raar itok ṃokta jān Eō, rej ri koṃot , im ri rakimi; a jiiip raar jab eṃroñ er.
- [9] Ña aor: eḷaññe jabdewōt armej ej deḷoñ, kōn Ña, e naaj mour, im e naaj deḷoñ im diwōj, im lo kijen.
- [10] Ri koṃot ej itok, bwe en koṃot, im ṃan, im koṃkure: Ña Ij itok bwe ren bōk mour, im bwe ren bōk elōñ.
- [11] Ña seperd eṃṃan: seperd eṃṃan ej leḷok an mour kōn jiiip ko.
- [12] A eo e ri jermal, im jab seperd, im e jab an jiiip ko, ej lo kidu oḷip itok, im ej likūt jiiip, im ko, im kidu oḷip ej jibwe er, im kajeplōklōk er.
- [13] Ri jermal ej ko, bwe e ri jermal, im e jab kaorōk jiiip ko.
- [14] Ña seperd eṃṃan, im I jeḷā ro Aō, im ro Aō re jeḷā Ña,
- [15] Āinwōt Jema e jeḷā Ña, im Ña I jeḷā Jema: im Ij likūt Aō mour kōn jiiip ko.
- [16] Im bar jet Aō jiiip, re jab jān wōrwōr iṃ: eṃṃan barāinwōt In āñintok er, im re naaj roñ ainikiō; im re naaj juon wōt bwij, im juon seperd.
- [17] Kōn men iṃ Jema ej yokwe Eō, bwe Ij likūt Aō mour bwe in bar bōk e.
- [18] Ejjeḷok armej ej bōke jān Eō, a Ña Ij make likūt e. Ij maroñ bwe In likūt e, im Ij maroñ bwe In bar bōke, Kien iṃ I ar bōk jān Jema.
- [19] E bar waḷok jepel ippān ri Ju ro kōn naan kein.
- [20] Im eloñ iaer re ba, Tiṃoṃ ippān, im Ej wūdeakeak; etke komij roñjake.
- [21] Bar jet re ba, Naan kein jab naan ko an eo juon tiṃoṃ ippān. Tiṃoṃ ej maroñ in kaloḷokjeṃ eo e pilo ke?
- [22] Im kiiō kwōjkwōj in leḷok i Jerusalem, im iien e piō.
- [23] Im Jijej ej etetal ilowan tempel ilo portiko an Solomōn.
- [24] Innām ri Ju ro rej itok im kōpool E, im ba ñan E, Ietoōn Aṃ dāpij ṃool jān kōm? Eḷaññe Kwe ri Kūraiḷ, kwōn kōnnaanōk kōm alikkar.
- [25] Jijej e uwaak er, I ar kōnnaanōk kom, im kom jab tōmak; jermal ko Ij kōṃanṃan ilo etan Jema, rej kōnnaan kōn Eō.
- [26] A kom jab tōmak bwe kom jab iaan Aō jiiip, āinwōt I ar ba ñan kom.
- [27] Aō jiiip rej roñjake ainikiō, im I jeḷā er, im rej ḷoor Eō:
- [28] Im Ij leḷok ñan er mour indeeo; im re jāmin jako indeeo, im ejjeḷok en e naaj kotak er jān peiō.
- [29] Jema, eo E ar litok ñan Eō, Ej eḷap jān otemjej: im ejjeḷok armej ej maroñ in kotak er jān pein Jema.
- [30] Ña im Jema kōmro wōt juon.
- [31] Ri Ju ro rej bar kabwijere dekā ko bwe ren kade.
- [32] Jijej e uwaak er, Elōñ jermal ko reṃṃan I ar kwaḷok ñan kom jān Jema: kōn jermal oṭ iaan jermal ko komij kade Eō?
- [33] Ri Ju ro re uwaak, im ba, Kōm jab kade Eok kōn jermal eṃṃan, a kōn blaspim, im bwe Kwe juon eṃṃaan, Kwōj make kōṃṃan Eok Anij.
- [34] Jijej e uwaak er, E jab jeje ilo kiemi, Ij ba Kom Anij ke?

- [35] Eļāñņe E ar likūt etaer anij, ro naan in Anij e ar itok ñan er, (im Jeje ko re ban jako:)
- [36] Komij ba kōn E, eo Jema e ar kokwōjarjar, im jilkintok ñan laļ, Kwōj blaspm, bwe I ar ba, Ña Nejin Anij ke?
- [37] Eļāñņe I jab kōmanman jermal ko an Jema, komwin jab tōmak Eō.
- [38] A eļāñņe Ij kōmanman, meñe kom jab tōmak Eō, komwin tōmak jermal ko; bwe komwin jeļā, im meļeļe bwe Jema ej ilo Ña, im Ña ilo E.
- [39] Rej bar pukot bwe ren jibwe: a Ej ko jān peir.
- [40] Im Ej bar ilok i reear in Jordan ilo āne eo ijo Jon e ar peptaj mokta; im ej pād ijo.
- [41] Im elōñ rej itok ñan E, im ba, Jon e ar kōmanman ejjeļok kakōļle: a men otemej, Jon e ar kōnono kōn armej in, re mool.
- [42] Im elōñ rej tōmak E ijo.

JEPTA 11

- [Jn 11.1] Juon armej e nañinmej, etan Lazerōs, ri Betani, jikin kwelok an Meri im Marta jein.
- [2] Meri in eo e ar kapit Irooj kōn men in kapit, im kōmōrāik neen kōn koolan bōran, jein im jaten maan Lazerōs e nañinmej.
- [3] Innām jein im jaten kōrā rej jeļokļok ñan E, im ba, Irooj, lo, eo Kwōj yokwe e nañinmej.
- [4] Ke Jijej ej roñjake, E ba, Nañinmej in e jab bwe en mej, a kōn an Anij aiboojoj, bwe Nejin Anij en aiboojoj kake.
- [5] Im Jijej ej yokwe Marta, im jaten kōrā, im Lazerōs.
- [6] Ke emōj An roñ bwe e nañinmej, iien eo Ej pād wōt ruo raan ijo E ar pād ie.
- [7] Ālikin iien eo Ej ba ñan ro ri kaļooran, Jān bar ilok ñan Judia.
- [8] Ri kaļooran re ba ñan E, Rabbai, ekkein lok ri Ju ro raar pukot bwe ren kade Eok; im Kwōj bar ilok ñan ijo ke?
- [9] Jijej e uwaak, E jab joñoul im ruo awa ilo raan ke? Eļāñņe jabdewōt armej ej etetal ilo raan e jab tipñōl, bwe ej lo meram in laļ in.
- [10] A eļāñņe armej ej etetal ilo boñ, e tipñōl, bwe meram e jab ilo e.
- [11] Ej ba men kein; im tokālik Ej ba ñan er, Jerad Lazerōs ej kiki; a Ij ilok bwe In koruj e jān kiki.
- [12] Innām ri kaļooran re ba, Irooj, eļāñņe ej kiki e naaj mour.
- [13] A Jijej ej kōnono kōn an mej: a rej ļōmņak bwe E ar kōnono kōn kakkije ilo kiki.
- [14] Innām Jijej e ba ñan er alikkar, Lazerōs e mej.
- [15] Im Ij mōñōñō kōn kom bwe I ar jab pād ijo, bwe komwin tōmak; a jān etal ñan ippān.
- [16] Innām Tomas, āt eo juon Didimōs, ej ba ñan ri kaļoor ro jet, Barāinwōt kōjiōñ jān ilok, bwe jān mej ippān.
- [17] Ke Jijej ej itok, E jeļā bwe emōj an pād ilo lōb iumwin emān raan.
- [18] Im Betani epaak Jerusalem, enañin ruo mamiļ jān e.

- [19] Im elõñ iaan ri Ju ro, re kar itok ñan ippån Marta im Meri, bwe ren kaaenõmman er kõn jeir im jateir maan.
- [20] Innām ke Marta ej roñ bwe Jijej ej itok, ij ilok im ioon E: a Meri ej jijet wõt ilowan im.
- [21] Innām Marta ej ba ñan Jijej, Irooj, eļañne Kwõ Kwar pād ijin, jeiõ im jatiõ maan e jāmin kar mej.
- [22] Im I jeļā bwe kiiõ, jabdewõt men eo Kwõ naaj kajjitõk ippån Anij e naaj lewõj ñan Eok.
- [23] Jijej ej ba ñan e, Jiom im jatiõm maan e naaj bar jerkak.
- [24] Marta e ba ñan E, I jeļā e naaj bar jerkak ilo jerkakpeje eo ilo raan āliktata.
- [25] Jijej e ba ñan e, Ņa jerkakpeje eo im mour eo: eo ej lõke Eõ, meñe e mej, e naaj bar mour.
- [26] Im jabdewõt eo ej mour im lõke Eõ, e jāmin mej indeeo. Kwõj tõmak men in ke?
- [27] Ej ba ñan E, Aet, Irooj, I ar tõmak bwe Kwe ri Kūraj, Nejin Anij, Eo ej itok ñan la.
- [28] Im ke emõj an kõnono āinwõt, ej ilok, im wūnojidikdik ñan Meri jaten kōrā, im ba, Ri Kaki ej ijin, im Ej kūr eok.
- [29] Ke emõj an roñjake, emõkaj an jutak, im ilok ñan ippån.
- [30] Kiiõ Jijej e jañin itok ilowan jikin kwelok, a Ej pād ijo Marta e ar ioon E ie.
- [31] Innām ri Ju rej pād ippån ilowan im, im kaaenõmman e, ke rej lo Meri, bwe emõkaj an jutak im ilok, rej ļoor e, im ļõmņak, Ej ilok ñan lõb bwe en jañ ijo.
- [32] Innām ke Meri ej itok ijo Jijej ej pād ie, im lo E, ej buñ iturin neen, im ba ñan E, Irooj, eļañne Kwõ Kwar pād ijin, jeiõ im jatiõ maan e jāmin kar mej.
- [33] Innām ke Jijej ej lo an jañ, im barāinwõt ri Ju rej itok ippån tok rej jañ, Ej limõ ilo an, im būromõj,
- [34] Im ba, Ewi ijo kom ar likūt e? Re ba ñan e, Irooj, kwõn itok im loe.
- [35] Jijej e jañ.
- [36] Innām ri Ju rej ba, Lo enañin ļap An yokwe e.
- [37] Im jet iaer re ba, Armej in eo e ar kaloļokjeņ eo e pilo, E ar jab maroñ in kõmanman bwe armej in e jāmin kar mej ke?
- [38] Innām Jijej ej bar limõ ilo E im itok ñan lõb eo. E juon roñ, im juon ejmaan ej pād ioon.
- [39] Jijej e ba, Komwin joļok ejmaan eo. Marta, jein im jaten eo e ar mej, ej ba ñan E, Irooj, ilo iien in e puwaļ: bwe emān raan e ar mej.
- [40] Jijej ej ba ñan e, I ar jab ba ñan eok ke, Eļañne kwõj tõmak, kwõ naaj lo aiboojoj an Anij?
- [41] Innām rej kamakūt ejmaan eo. Im Jijej ej jar, im ba, Jema kom mool bwe Kwar eņroñ Eõ.
- [42] Im I jeļā bwe Kwõj roñjake Eõ iien otemjej; a kõn armej ro rej jutak ijin I ar ba, bwe ren tõmak bwe Kwar jilkintok Eõ.
- [43] Im ke emõj An kõnono āindein, Ej lamõj kõn ainikien eļap, Lazerõs, kwõn itok.

- [44] Im eo e ar mej ej itok, kūtimi pein im neen kōn nuknuk in mej: im turin mejan lukwōje kōn bwiniin mej. Jijej e ba ñan er, Komwin kōtłok e bwe en ilok.
- [45] Innām elōñ iaan ri Ju rej itok ñan ippān Meri, im lo men ko Jijej e ar kōmman, rej tōmak E.
- [46] A jet iaer rej ilok ñan Parisi ro, im kōnnaanōk er men ko Jijej e ar kōmman.
- [47] Innām pris ro ełap im Parisi ro rej kokweiloklok ro ri pepe, im ba, Ta eo jej kōmmane? bwe armej in Ej kōmanman elōñ kakōlle.
- [48] Ełañne jej likūt E ainwōt, armej otemjej re naaj tōmak E; im ri Rom re naaj itok im kōkkure jiked im bwijjed.
- [49] Im juon iaar etan Keiapas, e pris eo ełap ilo iio in, ej ba ñan er, Kom jab jełā ñan jidik;
- [50] Im kom jab ļōmņak bwe emman ñan kōj bwe juon armej en mej kōn armej raņ, im bwij otemjej ren jab jako.
- [51] Im e make jab kōnono men in; a e pris eo ełap ilo iio in, ej rūkaanij bwe Jijej e naaj mej kōn bwij eo;
- [52] Im e jab kōn bwij eo wōt, a bwe barāinwōt En kobaik ñan doon ro nejin Anij rej jeplōklōk.
- [53] Innām jān raan eo im ālikin rej pepe ippān doon bwe ren man E.
- [54] Innām Jijej e jab bar etetal alikkar ippān ri Ju ro; a Ej ilok jān ijo ñan juon āne epaak āne jemaden, ilo juon jikin kwelok etan Ipreim, im Ej pād ijo ippān ro ri kałooran.
- [55] Im epaak kwōjkwōj in kijoone an ri Ju ro; im elōñ rej ilok jān āne eo ñan Jerusalem mokta jān kwōjkwōj in kijoone, bwe ren karreo er.
- [56] Innām rej pukot Jijej, im kōnono ñan doon, ke rej jutak ilowan tempel, Ta eo komij ļōmņak? E jāmin itok ñan kwōjkwōj ke?
- [57] Pris ro im Parisi ro raar likūt juon kien, bwe, ełañne jabdewōt armej e jełā ijo Ej pād ie, en kwałok e bwe ren jibwe E.

JEPTA 12

- [Jn 12.1] Innām jiljino raan mokta jān kwōjkwōj in kijoone, Jijej ej itok ñan Betani, ijo Lazerōs ej pād ie, eo Jijej e ar kejerkak e jān ro re mej.
- [2] Ijo raar kōmman kejota ñan E; im Marta e ri jermal ñan er: a Lazerōs e juon iaan ro rej jibadek ippān im mōñā.
- [3] Innām Meri ej bōk juon boun nard erre, men in kapit, ełap oñān, im ej kapit neen Jijej, im kōmōrāik neen kōn koolan bōran; im mweo eobrak kōn ñaj jān men in kapit eo.
- [4] A juon iaan ro ri kałooran, Judas Iskariōt, eo e naaj ketak E, e ba,
- [5] Etke ar jab wiakake men in kapit in kōn jilubukwi sillin, im lełok ñan ro ri jeramōl?
- [6] Ej ba men in, jab bwe ej bōk ñan ro ri jeramōl; a bwe e ri kōot, im bōjo ippān, im ej bōk men ko ilowan.

- [7] Innām Jijej e ba, En pād wōt: e ar kōjparok men in mae raan eo, raan in kalbwin Eō.
- [8] Bwe ri jeraṃōl rej pād ippemi iien otemjej; a Ña I jab pād ippemi iien otemjej.
- [9] Innām elōñ iaan ri Ju ro kajoor rej jeļā bwe Ej pād ijo; im rej itok jab kōn Jijej wōt, a bwe ren barāinwōt lo Lazerōs, eo E ar kejerkakpeje jān ro re mej.
- [10] A pris ro reļap rej pepe bwe ren barāinwōt ṃan Lazerōs:
- [11] Bwe kōn e elōñ iaan ri Ju ro rej ilok im lōke E.
- [12] Ilo raan eo ālik elōñ armej ro raar itok ṃan kwōjkwōj, ke rej roñ bwe Jijej ej itok ṃan Jerusalem,
- [13] Rej bōk ra ko raan wōjke pam, im ilen ioon E, im laṃōj, Hosana; Eṃōṃōṃō Eo ej itok ilo etan Irooj, eo Kiñ in Israel.
- [14] Im Jijej, ke eṃōj An lo koon ass, Ej jijet ioon; āinwōt raar je,
- [15] Kwōn jab mijak, kwe jiroñ nejin Zaiōn: lo aṃ Kiñ ej itok, im jijet ioon koon ass.
- [16] Men kein ri kaļooran re jaje ṃokta; a ke eṃōj an Jijej aiboojoj, rej keememej bwe ar jeje men kein kōn E, im bwe raar kōṃṃan men kein ṃan E.
- [17] Innām armej ro raar pād ippān ke E ar kūrtoke Lazerōs jān lōb eo, im kajerkekpeje e jān ro re mej, rej kōnnaan kake.
- [18] Barāinwōt kōn men in armej rej ilem ioon E, bwe rej roñ E ar kōṃṃan kakōļle in.
- [19] Innām Parisi ro re ba ṃan doon, Koṃwin lale ekōjkan ami bane: lo ri laļ otemjej rej ilok ilokōnļok.
- [20] Im jet ri Grik iaan ro rej itok bwe ren kabuñ ilo kwōjkwōj eo.
- [21] Innām rein rej itok ṃan Pilip, eo jān Betseida i Galili, im kajjitōk ippān, im ba, Irooj, kōm kōṃnaan lo Jijej.
- [22] Pilip ej itok im ba ṃan Andru: im Andru ej itok, im Pilip, im rej kōnnaanōk Jijej.
- [23] Im Jijej ej uwaak er im ba, Awa e moottok, bwe Nejin armej en aiboojoj.
- [24] Eṃool, eṃool, Ij ba ṃan kom, Eļaññe ineen wit e jab buñ ilo bwidej, im mej, ej make pād: a eļaññe e mej ej jebar elōñ leen.
- [25] Eo ej yokwe an mour, mour e naaj jako jān e; im eo ej kajekdoṃn an mour ilo laļ in, e naaj kōjparok e ṃan mour indeeo.
- [26] Eļaññe jabdewōt armej ej jermal ṃan Eō, en ļoor Eō, im ijo Ij pād ie, ijo barāinwōt ri korijera e naaj pād ie; im eļaññe jabdewōt armej ej jermal ṃan Eō, Jema e naaj koutiej e.
- [27] Kiiō ebiuk būruō; im ta eo I naaj ba? Jema, kwōn ļoṃoṃr Eō jān awa in. A kōn men in I ar itok ṃan awa in.
- [28] Jema, kwōn kaiboojoj etaṃ. Innām juon ainikien ej itok jān lañ, im ba, I ar kaiboojoj e, im I naaj bar kaiboojoj e.
- [29] Innām armej ro re jutak, im roñjake, re ba, E jourur: bar jet re ba, Juon enjeļ ej kōnono ippān.
- [30] Jijej e uwaak im ba, Ainikien in e ar itok jab kōn Ña, a kōn kom.
- [31] Kiiō ekajete laļ in: kiiō naaj kadiwōjļok irooj in laļ in.
- [32] Im Ña, eļaññe rej lelōñļok Eō jān laļ, I naaj ipertok armej otemjej ṃan Eō.
- [33] Ej kōnono men in, bwe En bakajjien wāween mej eo E naaj mej kake.

- [34] Jar eo re uwaak E, Kōm ar roñ jān kien bwe ri Kūraij ej pād indeeo: im ekōjkan Aṃ ba, Naaj lelōñ]ok Nejin armej?
- [35] Innām Jijej e ba ñan er, Meram ej pād ippemi jidik wōt iien. Komwin etetal iien meram ej pād ippemi, ñe ab marok en itok iomi: bwe eo ej etetal ilo marok e jaje ijo ej ilok ie]ok.
- [36] Iien meram ej pād ippemi, komwin lōke meram, bwe komwin nejin meram. Jijej ej kōnono men kein, im ilok, im tilekek jān er.
- [37] A bwe E ar kōmman elōñ kakō]le iṃaan mejeir, re jab tōmak E:
- [38] Bwe en jejjet naan Aiseia ri kanaan e ar kōnono, Irooj, wōn ej tōmak am in naan? im ñan wōn ar kwa]ok pein Irooj?
- [39] Kōn men eo re ban tōmak, bwe Aiseia e bar ba,
- [40] Ej kapilo mejeir, im kapen būrueir; bwe ren jab lo kōn mejeir, im je]ā kōn būrueir, im uke]ok ippaer, im In jab kemour er.
- [41] Men Kein Aiseia e ar ba, bwe e ar lo An aiboojoj, im kōnono kōn E.
- [42] A elōñ iaan irooj rañ raar tōmak E; a kōn Parisi ro re jab kwa]ok E ñe re ab jo]ok er jān iṃōn kwelok.
- [43] Bwe rej yokwe nōbar an armej e]ap jān nōbar an Anij.
- [44] Im Jijej ej lamōj im ba, Eo ej lōke Eō e jab lōke Eō a Eo e ar jilkintok Eō.
- [45] Im eo ej lo Eō ej lo Eo e ar jilkintok Eō.
- [46] Ña meram I moottok ñan la], bwe jabdewōt eo ej lōke Eō en jāmin pād ilo marok.
- [47] Im e]aññe jabdewōt armej ej roñ naan ko Aō, im jab kōjparoki, I jab ekajet e: bwe I ar jab itok bwe In ekajet la], a bwe In lōmōoren la].
- [48] Eo ej jo]ok Eō, im jab bōk naan ko Aō, juon ippān e naaj ekajete: naan eo I ar kōnono, men iṃ e naaj ekajete ilo raan eo āliktata.
- [49] Bwe I ar jab make kōnono jān Eō; a Jema eo e ar jilkintok Eō, E ar letok ñan Eō kien, men eo In ba im men eo In kōnono kake.
- [50] Im I je]ā bwe kien eo An, ej mour indeeo: innām men ko Ij kōnono kaki, im āinwōt Jema e ar ba ñan Eō, āindein Aō kōnono.

JEPTA 13

- [Jn 13.1] Kiiō mokta jān kwōjkwōj in kijoone; kōn an Jijej je]ā bwe awa eo An e moottok bwe En ilok jān la] iṃ ñan Jemen; E ar yokwe ro doon rej pād i la] im Ej yokwe er ñan jem]okōn.
- [2] Im ilo kejota, eṃōj an tepi] likūt ilo būruen Judas Iskariōt, nejin Saimōn, bwe en ketak E;
- [3] Jijej e je]ā bwe Jemen e ar likūt men otemjej ilo pein, im bwe E ar itok jān Anij, im ilok ñan Anij;
- [4] E jutak jān kejota, im utūk nuknuk ko An; im Ej bōk nuknuk in kōmōrā, im kañūrñūr kake.
- [5] Innām Ej lutōk dān ilo jāpe, im jino An kwa]e neen ro ri ka]ooran, im kōmōrāik kōn nuknuk in kōmōrā eo E ar kañūrñūr kake.
- [6] Im Ej itok ñan Saimōn Piter; im ej ba ñan E, Irooj, kwōj kwa]e neiō ke?

- [7] Jijej e uwaak im ba ñan e, Men eo Ij kōmmane kwō jaje kiiō; a kwō naaj mejele tokālik.
- [8] Piter e ba ñan E, Kwō jāmin kwaļe neiō indeeo. Jijej e uwaak e, Eļañņe I jab kwaļe eok, ejjeļok aṃ ājinkōj ippa.
- [9] Saimōn Piter e ba ñan E, Irooj, jab neiō wōt, a barāinwōt peiō im bōra.
- [10] Jijej e ba ñan e, Eo e ar tutu eṃman en kwaļe neen wōt, a ej erre otem erre: im komij erre, a jab kom otemjej.
- [11] Bwe E jeļā eo e naaj ketak E; kōn men iṃ E ba, e jab kom otemjej erre.
- [12] Innām ke eṃōj An kwaļe neir, im bōk nuknuk ko An, im bar jibadek; E ba ñan er, Kom jeļā ke men eo I ar kōmanman ñan kom?
- [13] Kom likūt eta Ri Kaki im Irooj: im eṃman ami ba; bwe Ņa āindein.
- [14] Innām eļañņe Ņa, ami Irooj im Ri Kaki, I ar kwaļe neōmi; eṃman komwin kwaļe neen doon.
- [15] Bwe I ar lewōj ñan kom juon joñak, bwe komwin barāinwōt kōmman āinwōt I ar kōmman ñan kom.
- [16] Eṃool, eṃool, Ij ba ñan kom, Ri korijer e jab utiej jān Irooj eo an; barāinwōt ri jeļōk e jab utiej jān eo ej jilkinļok e.
- [17] Eļañņe kom jeļā men kein, kom ṃōṃōṃō eļañņe komij kōmanman.
- [18] I jab kōnono kōn kom otemjej: I jeļā ro I ar kāālōt er: a bwe en kaṃool jeje iṃ, Eo ej ṃōñā Aō bred, ej deļok Eō kōn jimwin neen.
- [19] Jān iien iṃ Ij ba ñan kom ṃokta jān an itok, bwe ñe e moottok, komwin tōmak bwe Ņa E.
- [20] Eṃool, eṃool, Ij ba ñan kom, Eo ej bōk jabdewōt eo Ij jilkinļok e ej bōk Ņa; im eo ej bōk Ņa, ej bōk Eo e ar jilkintok Eō.
- [21] Ke eṃōj an Jijej ba āindein, Ej poktak ilo An, im kōnnaan, im ba, Eṃool, eṃool, Ij ba ñan kom, bwe juon iaami e naaj ketak Eō.
- [22] Innām ri kaļooran rej kallimjek doon, im jaje wōn eo Ej kōnono kake.
- [23] Im juon iaan ro ri kaļooran, eo Jijej ej yokwe e, ej atartar ioon ubōn Jijej.
- [24] Innām Saimōn Piter, ej romeje im ba, Kwōn kōnnaanōk kōm wōn eo Ej kōnono kake.
- [25] Innām ej atartar ioon ubōn Jijej, im ej ba ñan E, Irooj wōn eo?
- [26] Jijej e uwaak, Eo Ij leļok ṃōttan kijen ñan e, ñe eṃōj Aō katutu e. Im ke eṃōj An katutu ṃōttan kijen, Ej bōk im leļok ñan Judas, nejin Saimōn Iskariōt.
- [27] Im ālikin ṃōttan kijen eo Setan ej deļoñ ilo e. Innām Jijej e ba ñan e, Men eo kwōj kōmman kwōn kōmmane ṃōkaj.
- [28] Ejjeļok iaan ro rej jibadek ippān jeļā en ta E ar kōnono men iṃ ñan e.
- [29] Bwe jet iaer rej ļōmṃak, kōn an bōjo pād ippān Judas, bwe Jijej e ar ba ñan e, Kwōn wiaik men ko jej aikuj ilo kwōjkwōj: ak bwe en leļok jabdewōt ñan ro ri jeramōl.
- [30] Innām ke eṃōj an bōk ṃōttan kijen, eṃōkaj an diwōjļok, im e boñ.
- [31] Ke eṃōj an ilok, Jijej e ba, Kiiō Nejin armej e aiboojoj, im Anij ej aiboojoj kōn E:
- [32] Im Anij e naaj kaiboojoj E ilo E make, im e naaj ṃōkaj An kaiboojoj E.

- [33] Ajri redik, kiiõ bar jidik wõt iien Ij pād ippemi. Kom naaj kapukõt Eõ: im ainwõt I ar ba ñan ri Ju ro, Ijo Ij ilok ie lok kom jab maroñ in itok, aindein Ij ba ñan kom.
- [34] Kien ekãal Ij lewõj ñan kom, Komwin yokwe doon; ainwõt I ar yokwe kom, komwin barainwõt yokwe doon.
- [35] Ilo men in armej otemjej re naaj jelã bwe komij ri kaloora, eñañne komij yokwe doon.
- [36] Saimõn Piter e ba ñan E, Irooj, kwõj ilok ñan ia? Jijej e uwaak e, Ijo Ij ilok ie lok, kwõ jab maroñ in loor Eõ kiiõ; a tokalik kwõ naaj loor Eõ.
- [37] Piter e ba ñan E, Irooj, etke I jab maroñ in loor Eok kiiõ? I naaj liküt aõ mour kõn Eok.
- [38] Jijej e uwaak e, Kwõ naaj liküt am mour kõn Eõ ke? Emool, emool, Ij ba ñan eok, kako e jãmin kūr mokta jãn am kaarmejjjet Eõ alen jilu.

JEPTA 14

- [Jn 14.1] En jab pok būruemi, komwin lõke Anij, komwin barainwõt lõke Eõ.
- [2] Ilo imõn Jema elõñ jikin: eñañne jab aindein, I naaj kar kõnnaanõk kom mokta; bwe Ij ilen kapojak jikõmi.
- [3] Im eñañne Ij ilem kapojak jikõmi, I naaj bar itok im bõk kom ñan Eõ: bwe ijo Ij pād ie, barainwõt komwin pād ie.
- [4] Im ijo Ij ilok ie lok kom jelã ial.
- [5] Tomas ej ba ñan E, Irooj, kõm jaje ijo kwõj ilok ie lok, im ekõjkan am jelã ial?
- [6] Jijej e ba ñan e, Ña ial, im mool, im mour: ejjelok armej ej itok ñan Jema, eñañne jab kõn Eõ.
- [7] Eñañne kom ar jelã Ña, barainwõt kom naaj kar jelã Jema: im jãn iien in kom jelã E, im ar lo E.
- [8] Pilip e ba ñan E, Irooj, kwõn kwaļok Jemañ ñan kõm, innãm emõj.
- [9] Jijej e ba ñan e, E nañin etto Aõ pād ippemi, im kwõ jaje Ña ke, Pilip? Eo e ar lo Ña, e ar lo Jema; im ekõjkan am ba, Kwõn kwaļok ñan kõm Jemañ?
- [10] Kwõ jab tõmak ke bwe Ña ilo Jema, im Jema ilo Ña? Naan ko Ij kõnono ñan kom, I jab kõnono jãn Ña: a Jema ej pād ilo Ña, Ej kõmanman jermal ko An.
- [11] Komwin tõmak Eõ, bwe Ña ilo Jema im Jema ilo Ña: ak eñañne jab ainwõt, komwin tõmak Eõ kõn jermal ko wõt.
- [12] Emool, emool, Ij ba ñan kom, Eo ej lõke Ña, jermal ko Ij kõmanman, e naaj kõmman barainwõt; im jermal ko reļap jãn kein e naaj kõmman; bwe Ij ilok ñan Jema.
- [13] Im jabdewõt men eo kom naaj kajjitõk ilo eta, men in I naaj kõmanmane, bwe Jema en aiboojoj ilo Nejin.
- [14] Eñañne kom naaj kajjitõk jabdewõt ilo eta, men in I naaj kõmmane.
- [15] Eñañne komij yokwe Eõ, kom naaj kõjparok kien ko Aõ.
- [16] Im I naaj jar im kajjitõk ippãn Jema, im E naaj lewõj ñan kom bar juon Ri Kaaenõman, bwe En pād ippemi indeeo;

- [17] Jetōb ōn mool, Eo la] e ban bōk E, bwe e jab lo E, im e jab je]ā E: a kom je]ā E, bwe Ej jokwe ippemi, im E naaj pād ilo kom.
- [18] I jāmin likūt kom atajinemjen, I naaj iwōj ñan kom.
- [19] A jidik iien, im la] e jāmin bar lo Eō; a komij lo Eō: bwe Ij mour, kom naaj mour barāinwōt.
- [20] Ilo raan eo kom naaj je]ā bwe Ña ilo Jema im kom ilo Ña, im Ña ilo kom.
- [21] Eo kien ko Aō ippān, im ej kōjparoki, e i] eo ej yokwe Eō: im eo ej yokwe Eō Jema e naaj yokwe e, im I naaj yokwe e, im I naaj kwa]ok Eō ñan e.
- [22] Judas (jab Iskariōt) e ba ñan E, Irooj, ekōjkan A] naaj kwa]ok Eok ñan kōm, im jab ñan la]?
- [23] Jijej e uwaak im ba ñan e, E]aññe armej ej yokwe Eō, e naaj kōjparok Aō in naan; im Jema e naaj yokwe e, im kōm naaj itok ñan e, im jokwe ippān.
- [24] Eo e jab yokwe Eō e jab kōjparok naan ko Aō: im naan eo komij roñjake e jab Aō, a an Jema eo E ar jilkintok Eō.
- [25] Men kein I ar kōnono ñan kom, ke Ij pād ippemi.
- [26] A Ri Kaaenōmman, E Jetōb Kwōjarjar, Eo Jema e naaj jilkintok ilo eta, E naaj katakin kom men otemjej, im kakeememej men otemjej ñan kom, men ko I ar ba ñan kom.
- [27] Aenōmman Ij likūt ña ippemi, Aō aenōmman Ij lewōj ñan kom: Ña Ij lewōj ñan kom, jab āinwōt an la] lewōj. En jab pok būruemi, im en jab lō]ñōñ.
- [28] Kom ar roñ ekōjkan Aō ba ñan kom, Ij ilok, im bar iwōj ñan kom. E]aññe kom ar yokwe Eō, kom naaj kar lañlōñ, bwe Ij ilok ñan Jema: bwe Jema e]ap jān Ña.
- [29] Im kiiō I ar ba ñan kom mokta jān an itok, bwe, ñe e moottok, komwin tōmak.
- [30] Tokālik I jāmin bar kōnono elōñ ippemi: bwe Irooj in la] i] ej itok, im ejje]ok men eo an ilo Ña.
- [31] A bwe la] en je]ā bwe Ña Ij yokwe Jema; im āinwōt Jema e ar letok kien ñan Eō, āindein Ij kōmman. Komwin jutak, jān ilok jān ijin.

JEPTA 15

[Jn 15.1] Ña Ij vain e]ool, im Jema e Ri kallib.

- [2] Jabdewōt ra ilo Ña e jab jebar leen, Ej bōk]ok: im ra jabdewōt ej jebar leen, Ej karreoik e, bwe en or]ok an jebar leen.
- [3] Kiiō kom erreō kōn naan eo I ar kōnono ñan kom.
- [4] Komwin pād ilo Ña, im Ña ilo kom. Āinwōt ra e ban make jebar leen, e]aññe e jab pād ilo vain; āindein barāinwōt kom bane, e]aññe kom jab pād ilo Ña.
- [5] Ña vain, kom ra ko. Eo ej pād ilo Ña, im Ña ilo e, e i] ej jebar elōñ leen; bwe ñe kom jepel jān Ña kom ban kōmman jabdewōt.
- [6] E]aññe armej e jab pād ilo Ña, jo]ok e āinwōt ra, im ej aemed]ok: im rej āt er, im julok ilo kijeek, im tile er.
- [7] E]aññe komij pād ilo Ña, im naan ko Aō rej pād ilo kom, komwin kajjitōk jabdewōt eo kom kōnaan, im naaj kōmmane ñan kom.

- [8] Ilo men in Jema ej aiboojoj, bwe komij jebar elõñ leen; im äindein kom naaj ri ka]ooraa.
- [9] Äinwõt Jema e ar yokwe Eõ, baräinwõt I ar yokwe kom; komwin päd wõt ilo Aõ yokwe.
- [10] E]aññe komij kõjparok kien ko Aõ, kom naaj päd ilo Aõ yokwe; im äinwõt I ar kõjparok kien ko an Jema, im Ij päd ilo An yokwe.
- [11] Men kein Ij kõnono ñan kom bwe Aõ lañlõñ en päd ilo kom, im bwe ami lañlõñ en obrak.
- [12] Eñin kien eo Aõ, Bwe komwin yokwe doon, äinwõt I ar yokwe kom.
- [13] Ejje]ok yokwe ippän armej e]ap jän yokwe in, bwe armej en le]ok an mour kõn ro jeran.
- [14] Kom ro jera, e]aññe komij kõmman men ko Ij jiroñ kom.
- [15] I jämin bar ñaetami ri korijer; bwe ri korijer e jaje men eo Irooj eo an ej kõmman: a I ar ñaetami ro jera; bwe men otemjej I ar roñ jän Jema I ar kwa]ok ñan kom.
- [16] Kom ar jab kää]õt kom, im liküt kom bwe komwin ilok im jebar leen, im bwe leen eo ami en päd wõt; bwe jabdewõt men eo kom naaj kajjitök ippän Jema, En lewõj ñan kom.
- [17] Men kein Ij jiroñ kom, bwe komwin yokwe doon.
- [18] E]aññe la] ej kõjdate kom, komij je]ä bwe e ar kõjdate Eõ mokta jän kom.
- [19] E]aññe kom an la], la] e naaj kar yokwe men eo an: a bwe kom jab an la], a I ar kää]õt kom jän la], kõn men in la] ej kõjdate kom.
- [20] Komwin keememej naan eo I ar ba ñan kom, Ri korijer e jab utiej jän Irooj eo an. E]aññe raar matörtör Eõ, re naaj baräinwõt matörtöre kom; e]aññe raar kõjparok Aõ in naan, re naaj baräinwõt kõjparok ami naan.
- [21] A men kein otemjej re naaj kõmanman ñae kom kõn eta, bwe re jaje Eo e ar jilkintok Eõ.
- [22] E]aññe I ar jab itok im kõnono ñan er, ejje]ok jerowiwu e naaj kar ippaer; a kiiõ ejje]ok men in kadik]ok aer jerowiwu.
- [23] Eo ej kõjdate Eõ ej baräinwõt kõjdate Jema.
- [24] E]aññe I ar jab kõmanman ippaer jermal ko ejje]ok bar juon armej e ar kõmman, e naaj kar je]ok jerowiwu ippaer: a kiiõ raar lo im kõjdate Ña im Jema.
- [25] A men in, bwe en jejjet naan eo jeje ilo kieir, Raar kõjdate Eõ im ejje]ok unin.
- [26] A ñe Ri Kaaenõmman ej itok, Eo I naaj jilkinwõj ñan kom jän Jema, E Jetõb in mool, Eo ej itok jän Jema, E naaj kõnnaan kõn Eõ:
- [27] Im kom baräinwõt kõnnaan, bwe kom ar päd ippa jän jinoin.

JEPTA 16

[Jn 16.1] Men kein I ar kõnono ñan kom, bwe komwin jab tipñõl.

- [2] Re naaj jo]ok kom jän imõn kwelok ko; aet awa ej itok, ñe jabdewõt eo ej man kom, e naaj]õmman bwe ej jermal ñan Anij.
- [3] Im men kein re naaj kõmman ñan kom, bwe re jab je]ä Jema ak Ña.

- [4] A men kein I ar kōnono ñan kom, bwe ñe ej itok aer awa, komwin keememej er, ekōjkan I ar kōnnaanōk kom. Im men kein I ar jab ba ñan kom jān jinoin, bwe I ar pād ippemi.
- [5] A kiiō Ij ilok ñan Eo e ar jilkintok Eō; im ejjeļok iaami ej kajjitōk ippa, kwōj ilok ñan ia?
- [6] A bwe I ar ba men kein ñan kom, būromōj e ar kobraḱ būruemi.
- [7] Ijoke Ij ba ñan kom naan eḱool; eḱḱman ñan kom bwe In ilok: bwe eļaññe I jab ilok, Ri Kaenōḱman e jāmin iwōj ñan kom; a eļaññe Ij ilok, I naaj jilkinwōj E ñan kom.
- [8] Im ñe Ej itok, E naaj ḱaruōn laļ kōn jerowiwī im kōn kwōjarjar, im kōn ekajet:
- [9] Kōn jerowiwī, bwe re jab lōke Eō;
- [10] Kōn kwōjarjar bwe Ij ilok ñan Jema, im kom jab bar lo Eō:
- [11] Kōn ekajet, bwe ar ekajete irooj in laļ iḱ.
- [12] Bar elōñ men ko ippa bwe In ba ñan kom, a kom jab maroñ in bōki kiiō.
- [13] A ñe Eo, Jetōb ōn ḱool, Ej itok, e naaj tōl kom ñan lowaan ḱool otemjej; bwe E jāmin kōnono jān E make; a jabdewōt men eo E naaj roñjake, men iḱ E naaj kōnono: im E naaj kwaļok ñan kom men ko re naaj itok.
- [14] E naaj kaiboojoj Ña: bwe E naaj bōk jān men eo Aō, im E naaj kwaļok e ñan kom.
- [15] Men otemjej an Jema Aō: kōn men iḱ Ij ba, bwe E naaj bōk jān men eo Aō, im E naaj kwaļok e ñan kom.
- [16] Jidik wōt iien, im kom jab bar lo Eō: im bar jidik wōt iien, im kom naaj lo Eō.
- [17] Innām jet iaan ro ri kaļooran re ba ñan doon, ta men iḱ Ej ba ñan kōj, Jidik wōt iien, im kom jab bar lo Eō; im bar jidik wōt iien, im kom naaj lo Eō, im, Bwe Ij ilok ñan Jema?
- [18] Innām re ba, Ta men iḱ Ej ba, Jidik wōt iien? Je jaje ta eo Ej kōnono.
- [19] Innām Jijej ej kile bwe re kōḱaan kajjitōk ippān, im E ba ñan er, Kom kajjitōk ippān doon ke kōn men eo I ar ba, Jidik wōt iien im kom jab b ar lo Eō: im bar jidik wōt iien im kom naaj lo Eō?
- [20] Eḱool, eḱool, Ij ba ñan kom, kom naaj jañ im limō, a laļ e naaj lañlōñ; im kom naaj būromōj, a ami būromōj e naaj oktak ñan lañlōñ.
- [21] Kōrā ke ej eñtaan ej būromōj, bwe e moottok awa eo an: a ke e ļotak nejin, e jab bar keememej eñtaan kōn lañlōñ bwe juon armej e ļotak ilo laļ.
- [22] Im kiiō komij būromōj: a I naaj bar lo kom, im e naaj lañlōñ būruemi, im ejjeļok en ej bōk ami lañlōñ jān kom.
- [23] Ilo raan eo e naaj jeļok ami kajjitōk ippa. Eḱool, eḱool, Ij ba ñan kom, Eļaññe kom naaj kajjitōk ippān Jema, E naaj lewōj ñan kom ilo eta.
- [24] Kom jañin kajjitōk jabdewōt ilo eta; komwin kajjitōk im komnaaj bōk, bwe ami lañlōñ en obrak.
- [25] Men kein I ar kōnono ñan kom ilo naan ko rettino: a iien ej itok, ñe I jāmin bar kōnono ñan kom ilo naan ko rettino, a I naaj kwaļok ñan kom alikkar kōn Jema.

- [26] Ilo raan eo kom naaj kajjitōk ilo eta: im I jab ba ñan kom bwe I naaj jar im kajjitōk ippān Jema kōn kom.
- [27] Bwe Jema ej make yokwe kom, bwe kom ar yokwe Eō, im tōmak bwe I ar itok jān Anij.
- [28] I ar itok jān Jema, im itok ñan laḷ: bar juon, Ij likūt laḷ, im ilōk ñan Jema.
- [29] Ri kaḷooran re ba ñan E, Lo, kiiō kwōj kōnono alikkar, im jab kōnono ilo naan eo ettino.
- [30] Kiiō kōm jeḷā bwe Kwō jeḷā men otemjej, im Kwō jab aikuj bwe jabdewōt armej en kajjitōk ippam: kōm men in kōmij tōmak bwe Kwar itok jān Anij.
- [31] Jijej ej uwaak er, Komij tōmak kiiō ke?
- [32] Lo, awa ej itok, aet, e moottok, ñe kom naaj jeplōklōk, kom otemjej ñan jikōmi, im naaj likūt Eō make Iaō: ijoke I jab make Iaō, bwe Jema ej pād ippa.
- [33] Men kein I ar kōnono ñan kom, bwe ilo Ña komwin aenōmman. Ilo laḷ komij eñtaan: a komwin mōḥōḥō; Ña I ar bōk anjo ioon laḷ.

JEPTA 17

- [Jn 17.1] Naan kein Jijej e ar kōnono, im reiḷok ñan lañ, im ba, Jema e moottok awa eo: Kwōn kaiboojoj Nejōm, bwe Nejōm en kaiboojoj Kwe:
- [2] Āinwōt Kwar letok ñan E kajoor ioon kanniōk otemjej, bwe En leḷok mour indeeo ñan er otemjej Kwar letok ñan E.
- [3] Im men in mour indeeo, bwe ren jeḷā Kwe juon wōt Anij eḥool, im Jijej Kūraij, eo Kwar jilkintok.
- [4] I ar kaiboojoj Eok ioon laḷ: I ar kaḥōjḷok jermal eo Kwar letok ñan Eō bwe In kōmmane.
- [5] Im kiiō O Jema, kwōn kaiboojoj Eō kōn Kwe wōt kōn aiboojoj eo e ar pād ippa im ippam mokta jān laḷ.
- [6] I ar kwaḷok etaḥ ñan armej ro Kwar letok ñan Eō jān laḷ: ro Aḥ mokta, im Kwar letok er ñan Eō; im raar kōjparok Aḥ in naan.
- [7] Kiiō ro jeḷā bwe men otemjej jabdewōt, Kwar letok ñan Eō, jān Kwe.
- [8] Bwe I ar leḷok ñan er naan ko Kwar letok ñan Eō; im raar bōki, im kanooj jeḷā bwe I ar itok jān Kwe, im raar tōmak bwe Kwar jilkintok Eō.
- [9] Ij jar kōn er: I jab jar kōn laḷ, a kōn ro Kwar letok ñan Eō; bwe er Aḥ.
- [10] Im men otemjej Aō Aḥ, im Aḥ Aō; im Ij aiboojoj ilo er.
- [11] Im kiiō eḥōj Aō pād ilo laḷ, a er rej pād ilo laḷ, im Ij iwōj ñan Eok. Jema Kwōjarjar, kwōn kōjparok er ilo etaḥ wōt, ro Kwar letok ñan Eō, bwe ren juon wōt, āinwōt Kōj.
- [12] Ke I ar pād ippaer ilo laḷ, I ar kōjparok er ilo etaḥ, ro Kwar letok ñan Eō: im I ar oḥaake er, im ejeḷok juon iaer e jako, a dien mej eo, bwe en kaḥool Jeje ko.
- [13] A kiiō Ij iwōj ñan Eok; im men kein Ij kōnono ilo laḷ, bwe Aō lañlōñ en obrak ilo er.
- [14] I ar leḷok ñan er naan eo Aḥ; im laḷ e ar kōjdate er, bwe re jab jān laḷ, āinwōt Ña I jab jān laḷ.

- [15] I jab jar bwe Kwōn bōk er jān la], a bwe Kwōn kōjparok er jān eo enana.
- [16] Re jab jān la], āinwōt Ña I jab jān la].
- [17] Kwōn kokwōjarjar er ilo mool: Aṃ in naan mool eo.
- [18] Āinwōt Kwar jilkintok Eō ñan la], āindein Ij jilkin]ok er ilo la].
- [19] Im Ij kokwōjarjar Eō kōn er, bwe ren barāinwōt kwōjarjar ilo mool.
- [20] Ak I jab jar kōn rein wōt, a barāinwōt kōn ro re naaj lōke Eō kōn aer in naan;
- [21] Bwe er otemjej ren juon; āinwōt Kwe, Jema ilo Ña, im Ña ilo Kwe, bwe er barāinwōt ren ilo Kōj; bwe la] en tōmak bwe Kwar jilkintok Eō.
- [22] Im aiboojoj eo Kwar letok ñan Eō, I ar le]ok ñan er; bwe ren juon, āinwōt Kōj juon:
- [23] Ña ilo er, im Kwe ilo Ña; bwe ren weepñan]ok ilo juon; im bwe la] en je]ā bwe Kwar jilkintok Eō, im yokwe er, āinwōt Kwar yokwe Ña.
- [24] Jema, I kōṇaan bwe ro, Kwar letok ñan Eō, ren pād ippa ijo Ij pād ie, bwe ren lo Aō aiboojoj Kwar letok ñan Eō: bwe Kwar yokwe Eō mokta jān jinoin kōṃanṃan la].
- [25] O Jema e Wānōk, la] e ar jab je]ā Kwe: a Ña I ar je]ā Kwe, im rein raar je]ā bwe Kwar jilkintok Eō.
- [26] Im I ar kwa]ok etam ñan er, im I naaj kwa]ok e; bwe yokwe eo, Kwar yokwe Eō kake, en pād ilo er, im Ña ilo er.

JEPTA 18

- [Jn 18.1] Ke emōj an Jijej kōnono naan kein, Ej ilok ippān ro ri ka]ooran im e]l]ā jān wea Kidron, ijo juon jikin kallib, E im ri ka]ooran rej de]oñ ilowan.
- [2] Im Judas, eo e ar ketak E, e barāinwōt je]ā jikin eo; bwe e makij an Jijej ar ilok ñan ijo ippān ro ri ka]ooran.
- [3] Innām Judas, emōj an bōk jar an ri tariṇae im ro ri kabōjrak jān pris ro re]ap im Parisi ro, rej itok im ewor]aam im romaak im kein tariṇae ippaer.
- [4] Innām Jijej, bwe E je]ā men otemjej ren itok ioon, Ej ilok im ba ñan er, Wōn eo komij pukot e?
- [5] Re uwaak E, Jijej ri Nazaret. Jijej e ba ñan er, Ña E. Im barāinwōt Judas, eo e ar ketak E, e jutak ippaer.
- [6] Kiiō ke E ar ba ñan er, Ña E, rej jenlik, im buñ ioon bwidej.
- [7] Innām Ej bar kajjitōk ippaer, Wōn eo komij pukot e? Im re ba, Jijej ri Nazeret.
- [8] Jijej e uwaak, I ar ba ñan kom bwe Ña E: innām e]añne komij pukot Eō, kōt]ok rein bwe ren ilok.
- [9] Bwe en je]jet naan eo E ar kōnono, Ian ro Kwar letok ñan Eō, e jab jako juon iaer jān Eō.
- [10] Innām juon jāje ippān Saimōn Piter, im ej nuri, im jepak ri korijeran pris eo e]ap, im bukwe lo]ilñin anbwijmaroñan. Etan ri korijer eo Malkōs.
- [11] Innām Jijej e ba ñan Piter, Kwōn likūt jāje ṇe aṃ ṇa ilo nien: kab eo Jema eo ar letok ñan Eō, In jāmin idaak ke?
- [12] Innām jar eo im kapen im ri kabōjrak an ri Ju ro rej jibwe Jijej, im liāp E,

- [13] Im ãñin]lok E ñan Annas mokta; bwe e jemen lio pãleen Keiapas, pris eo e]ap ilo iiõ in.
- [14] Im Keiapas in, eo e ar pepe ñan ri Ju ro, bwe emman juon armej en mej kõn armej ran.
- [15] Im Saimõn Piter ej]oor Jijej, im bar juon ri ka]ooran: ri ka]ooran eo pris e]ap e jelã, im ej de]õñ ippãñ Jijej ilowan imõn pris eo e]ap.
- [16] A Piter e jutak ilikin kõjãm eo. Innãm ri ka]oor eo pris e]ap e jelã, ej ilok im kõnono ñan lio, eo ej lale kõjãm, im kade]õñ Piter.
- [17] Innãm jiroñ eo, ri lale kõjãm, e ba ñan Piter, Kwõ barãinwõt juon iaan ro ri ka]ooran armej in ke? E ba, Jab.
- [18] Im ro ri korijer im ri kabõjrak rej jutak ijo, raar kõjo kijeek kõn mälle, bwe e pio; im rej rañrañ: im Piter e jutak ippaer im make rañrañ.
- [19] Innãm pris eo e]ap ej kajjitõk ippãñ Jijej kõn ro ri ka]ooran, im kõn An naan in katak.
- [20] Jijej e uwaak e, I ar kõnono alikkar ñan la]; iien otemjej I ar katakin ilowan imõn kwelok ko, im ilowan tempel, ijo ri Ju ro otemjej rej kweiloklok ie; im ilo ettino ejjelok Aõ kõnono.
- [21] Etke kwõj kajjitõk ippa? kwõn kajjitõk ippãñ ro raar roñjake Eõ, ta eo I ar ba ñan er: lo, rein rej jelã ta eo I ar ba.
- [22] Ke emõj An kõnono ãindein, juon iaan ri kabõjrak ro rej jutak iturin, ej ubrare Jijej kõn pein im ba, ãindein Am uwaak pris eo e]ap ke?
- [23] Jijej e uwaak e, E]aññe I ar kõnono nana, kwõn kõnnaan kõn nana eo: a e]aññe emman, etke kwõj ubrare Eõ?
- [24] Annas e ar jilkin]lok E ke Ej ilok wõt, ñan Keiapas pris eo e]ap.
- [25] Im Saimõn Piter ej jutak im rañrañ e. Innãm re ba ñan e, Kwõ barãinwõt juon iaan ro ri ka]ooran de? Ej kaarmejjete, im ba, Jab.
- [26] Juon iaan ro ri korijeran pris eo e]ap, nukwin eo Piter e ar bukwe lojilñin, e ba, I ar jab lo eok ilo jikin kallib eo ippãñ ke?
- [27] Innãm Piter ej bar kaarmejjete E: im emõkaj an kako ikkür.
- [28] Innãm rej ãñin]lok Jijej jãn Keiapas ñan Pritoriõm, im e jibboñ; im er re jab de]õñ ilowan Pritoriõm eo bwe ren jab ettoon; a bwe ren mõñã kwõjkwõj in kijoone.
- [29] Innãm Pailat ej diwõj]lok ñan er, im ba, Ewi naan in kinaak]lok komij bõk ñae armej in?
- [30] Re uwaak im ba ñan e, E]aññe E ar jab ri nana, kõm jãmin kar ketak E ñan eok.
- [31] Innãm Pailat e ba ñan er, komwin make bõk E, im ekajet E kõn kiemi. Ri Ju re ba ñan e, E jab mälím bwe kõmin man jabdewõt armej.
- [32] Bwe naan jãn Jijej en jejjet, eo E ar ba, im bakajjien wãween mej eo E naaj mej kake.
- [33] Innãm Pailat ej bar de]õñ ilowan Pritoriõm, im kürtok Jijej, im ba ñan E, Kwe kiñ an ri Ju ro ke?
- [34] Jijej e uwaak, Kwõj ba men in jãn kwe make, ak ro jet raar ba men in ñan eok kõn Eõ ke?

- [35] Pailat e uwaak, Ña ri Ju ke? Ri aelõñ eo Am̄ im pris ro reļap raar ketak Eok ñan eõ: ta eo Kwar kōm̄mane?
- [36] Jijej e uwaak, Aelõñ eo Aõ e jab jãn laļ in; eļaññe Aõ aelõñ jãn laļ in, innām ro korijera ren ire, bwe en jab ketak Eõ ñan ri Ju ro: a kiiõ Aõ aelõñ e jab jãn ijin.
- [37] Kõn men in Pailat ej ba ñan E, Innām Kwe kiñ ke? Jijej e uwaak, Kwõj ba wõt. Ña kiñ. Kõn men in I ar ļotak, im kōn men in I ar itok ñan laļ, bwe In kōnnaan kōn mool. Er otemjej jãn mool rej eõron ainikiõ.
- [38] Pailat e ba ñan E, Ta eo mool? Im ke em̄oj an ba men in, ej bar diwõj ñan ri Ju ro, im ba ñan er, Ij lo ejjeļok ruõn.
- [39] A juon ami manit, bwe in kõtļok juon ñan kom ilo kwõjkwõj in kijoone: innām kom kōnnaan bwe in kõtļok ñan kom Kiñ an ri Ju ro ke?
- [40] Innām er otemjej rej bar lam̄oj im ba, Jab armej in, a Barabbas. A Barabbas e ri kowadoñ.

JEPTA 19

[Jn 19.1] Innām iien eo, Pailat ej bõk Jijej im deñļok E.

- [2] Im ri tariņae rej pirõk wõjke kälõklõk, im likūt e ña ioon bõran, im rej naballin kōn nuknuk ekilmir,
- [3] Im rej itok ñan E, im ba, YokweYuk, Kiñ an ri Ju ro, im rej ubrar E kōn peir.
- [4] Innām Pailat ej bar diwõjļok im ba ñan er, lo, Ij ãñinwõj E ñan kom, bwe komwin jeļã I jab lo notaan.
- [5] Innām Jijej ej diwõjļok, Ej pãlõk pãllin kälõklõk eo, im kōņak nuknuk eo ekilmir. Im Pailat e ba ñan er, Lo, Armej eo!
- [6] Innām ke pris ro reļap im ri kabõjrak rej lo E, rej lam̄oj im ba, Debwãal E, debwãal E. Pailat e ba ñan er, Komeo, komwin bõk E, im debwãal E; bwe I jab lo ruõn.
- [7] Ri Ju ro re uwaak e, Juon am kien, im kōn kien eo em̄man En mej, bwe E ar make kōm̄man E nejin Anij.
- [8] Innām ke Pailat ej roñ naan eo, eļapļok an mijak;
- [9] Im ej bar deļõñ ilowan Pritoriõm, im ba ñan Jijej, Kwõj jãn ia? A ejjeļok an Jijej uwaak e.
- [10] Innām Pailat e ba ñan E, Kwõ jab kōnono ñan eõ ke? Kwõ jaje ke bwe ij maroñ in debwãal Eok, im ij maroñ in kõtļok Eok?
- [11] Jijej e uwaak e, Ejjeļok am̄ maroñ ñae Eõ, eļaññe jab lewõj ñan eok jãn lañ: kōn men in eo e ar ketak Eõ ñan eok, eļapļok an jerõwiwi.
- [12] Jãn iien in Pailat ej pukot bwe en kõtļok E: a ri Ju ro rej lam̄oj, im ba, Eļaññe kwõj kõtļok armej in bwe En ilok, kwõ jab jeran Sizar: jabdewõt eo ej make kōm̄man e juon kiñ, ej kōnono ñae Sizar.
- [13] Innām ke Pailat ej roñ naan eo, ej ãñinļok Jijej, im ej jijet ioon kein jijet in ekajet ijo etan Pevment, a naan in Hibru Gabbeta.
- [14] Im iien in iien kapojak kwõjkwõj in kijoone, im enañin joñoul im ruo awa; im ej ba ñan ri Ju ro, Lo ami Kiñ!

- [15] A rej lamōj, Joļok E, joļok E, debwāāl E. Pailat e ba ñan er, In debwāāl ami Kiñ ke? Pris ro reļap re uwaak, Ejjeļok am kiñ, a Sizar wōt.
- [16] Innām ej ketak E ñan er bwe ren debwāāl E.
- [17] Im rej bōk Jijej; im Ej bōk debwāāl eo An im iloķ ñan ijo etan jikin ļat in bar, āt eo juon ilo Hibru, Golgota.
- [18] Ijo rej debwāāl E, im bar ruo ippān, juon ikajōb im juon ikajōb, im Jijej eoļōp.
- [19] Im Pailat e ar je juon kakōļļen, im likūt e ioon debwāāl. Im e ar je, JIJ EJ RI NAZERET KIÑ AN RI JU RO.
- [20] Innām elōñ iaan ri Ju ro rej kōnono kakōļļe in; bwe ijo raar debwāāl Jijej epaak jikin kwelok: im ar jeje ilo Hibru, im Rom, im Grik.
- [21] Innām pris ro reļap an ri Ju ro re ba ñan Pailat, Kwōn jab jeje, Kiñ an ri Ju ro; a bwe E ar ba, Ņa, kiñ an ri Ju ro.
- [22] Pailat e uwaak, Men eo I ar jeje, eņōj aō jeje.
- [23] Innām ro ri tariņae, ke eņōj aer debwāāl Jijej, rej bōk nuknuk ko An, im ajej emān mōttan, im kajju ļok ñan ri tariņae otemjej juon mōttan; im barāinwōt kopā: a kopā eo ejjeļok katin, eje jān lañ ñan laļ.
- [24] Innām re ba ñan doon, Jān jab kekeele, a kakōļļe bwe jān jeļā an wōn; bwe en kaņool jeje eo e ba, Raar kajulok Aō nuknuk ippaer, im kōn balliō raar kōmman kakōļļe. Innām ri tariņae raar kōmman men kein.
- [25] A jinen, im jein im jaten jinen kōrā Meri lio pāleen Kliopas, im Meri Magdalini, rej jutak iturin debwāāl eo an Jijej.
- [26] Innām ke Jijej ej lo jinen, im ri kaļooran eo Ej yokwe e jutak iturin, E ba ñan jinen, Kōrā, lo, neļōm!
- [27] Im E ba ñan ri kaļooran eo, Lo, jinōm! In jān awa eo ri kaļooran eo ej bōk lio ñan jikin.
- [28] Ālikin men in, Jijej e jeļā bwe ar kaņōjļok men otemjej kiiō, bwe en kaņool jeje, E ba, Ij maro.
- [29] Im e pād ijo juon jāpe elōñ kōn vinegar: im rej katutu matmat ilo vinegar eo, im likūt e iņaan hissōp, im likūt e ņa i loņin.
- [30] Innām ke eņōj an Jijej bōk vinegar eo, E ba, Eņōj! im Ej jirļok im kōtļok An.
- [31] Innām ri Ju ro, bwe iien kapojak, bwe ubeir ren jab pād ioon debwāāl ko ilo Jabōt, (bwe Jabōt eo raan eļap,) rej kajjitōk ippān Pailat bwe ren ruje neir, im bwe ren bōkļok er.
- [32] Innām ri tariņae rej itok, im ruje neen eo mōkta, im eo bar juon ar debwāāl e ippān.
- [33] A ke rej itok ñan Jijej, im lo bwe eņōj An mej, re jab ruje neen.
- [34] A juon iaan ro ri tariņae, ej wākari katin kōn mādē, im eņōkaj an bōtōktōk im dān tōor ļok.
- [35] Im eo ej loe, ej kōnnaan, im kōnnaan eo an eņool: im e jeļā bwe ej ba mool, bwe koņwin barāinwōt tōmak.
- [36] Bwe ar kōmanman men kein, bwe en jejjēt Jeje eo, Juon diin e jāmin moruj.
- [37] Im bar juon Jeje ej ba, Re naaj kallimjek Eo raar wākare.

- [38] Im ālikin men kein, Josep ri Arimetia, e ri kaļooran Jijej, a ilo ettino bwe e mijak ri Ju ro, ej kajjitōk ippān Pailat bwe en bōkļok ubōn Jijej; im Pailat e ba, Aet. Innām ej itok im bōkļok ubōn eo.
- [39] Im barāinwōt Nikodimōs ej itok, eo e ar itok mōkta ñan Jijej ilo boñ, im ej bōktok juon iiōkin mōrr im aloes, enañin jibukwi boun.
- [40] Innām rej bōk ubōn Jijej, im kūtimi ilo nuknuk linen ko ippān toļaj ko, āinwōt manit an ri Ju ro kallib.
- [41] Im ijo raar debwāāl E, juon jikin kallib; im ilo jikin kallib eo juon lōb ekāāl, re jañin likūt armej ilowan.
- [42] Innām rej likūt Jijej ilowan, bwe raan in kapojak an ri Ju ro; (bwe epaak lōb eo.)

JEPTA 20

- [Jn 20.1] Ilo raan eo mōkta ilo wiik, ke e jimmarok, Meri Magdalini ej itok ñan lōb eo, im ej lo ejmaān epeļļok jān lōb.
- [2] Innām ej ettōr im itok ñan Saimōn Piter, im ñan ri kaļooran eo juon, eo Jijej ej yokwe, im ba ñan erro, Raar bōkļok Irooj jān lōb eo im kōm jaje ijo raar likūt E ie.
- [3] Innām Piter ej ilok, im ri kaļooran eo juon, im rejro ilok ñan lōb eo.
- [4] Im rejro jīmōr ettōr; im ri kaļoor eo juon ej ettōr jān Piter, im mōkaj ļok mōkta ñan lōb eo.
- [5] Im ej jirļok, im lo ilowan nuknuk linen ko rej pād; a e jab deļoñ ilowan.
- [6] Innām Piter ej itok im ļoor e, im ej deļoñ ilowan lōb eo, im lo nuknuk linen ko rej pād,
- [7] Im napkin eo ej kūtimi bōran, e jab pād ippān nuknuk linen ko, a limi im kamakeļok iaan ilo juon jikin.
- [8] Innām barāinwōt ri kaļoor eo juon, eo ej itok mōkta ñan lōb eo, ej deļoñ, im lo, im tōmak.
- [9] Bwe ñan iien iņ re jaje Jeje eo, bwe En jerkakpeje jān ro re mej.
- [10] Innām ri kaļoor rejro bar ilok ñan mweo mweir.
- [11] A Meri ej jutak i nabōj iturin lōb eo im jañ: im ke ej jañ ej jirļok ilo lōb eo,
- [12] Im ej lo ruo enjeļ, rej kōņak nuknuk emouj, rej jijet, juon i bōran, im eo juon i neen, ijo ubōn Jijej e kar pād ie.
- [13] Im re ba ñan e, Kōrā, etke kwōj jañ? E ba ñan er, Bwe raar bōkļok aō Irooj, im I jaje ijo raar likūt E ie.
- [14] Im ke emōj an kōnono āinwōt, ej oktaklik, im lo Jijej e jutak, im e jaje e Jijej.
- [15] Jijej e ba ñan e, Kōrā, etke kwōj jañ? wōn eo kwōj pukot e? Ej ļōmņak E ri kallib, im e ba ñan E, Leyō, eļañņe Kwar bōkļok E jān ijin, kwōn kwaļok ñan eō ijo Kwar likūt E ie, im I naaj bōkļok.
- [16] Jijej e ba ñan e, Meri. Ej oktaklik, im ba ñan E, Rabbonai: ukōtōn naan, Ri Kaki.
- [17] Jijej e ba ñan e, Kwōn jab uññūr Eō; bwe I jañin wanlōñļok ñan Jema: a kwōn ilok ñan ro jeiō im jatiō, im ba ñan er, Ij wanlōñļok ñan Jema, im Jememi, im ñan Aō Anij, im ami Anij.

- [18] Meri Magdalini ej itok im ba ñan ro ri kaloor, I ar lo Irooj; im ekōjkan E ar kōnono men kein ñan e.
- [19] Innām raan eo ke ejota, raan eo mokta ilo wiik, ñe e kilōk aor ko ijo ri kaloor rej pād ie, bwe re mijak ri Ju ro, Jijej ej itok im jutak eoļōp er, im ba ñan er, Aenōmman ñan kom.
- [20] Im ke emōj an ba āindein, Ej kwaļok pein im katin ñan er. Innām ri kaloor rej lañlōñ, ke rej lo Irooj.
- [21] Innām Jijej e bar ba ñan er, Aenōmman ñan kom: āinwōt Jema e ar jilkintok Eō, āindein Ij jilkinļok kom.
- [22] Im ke emōj An ba men in, Ej kal er, im ba ñan er, Komwin bōk Jetōb Kwōjarjar.
- [23] Jerōwiwi ko an jabdewōt eo komij julōki, re jako: im jerōwiwi ko an jabdewōt eo komij dāpiji, re jāmin jako.
- [24] A Tomas juon iaan joñoul im ruo, āt eo juon Didimōs, e ar jab ippaer ke Jijej ej itok.
- [25] Innām ri kaloor ro jet, re ba ñan e, Kōm ar lo Irooj. A ej ba ñan er, Eļañne I jab lo ilo pein kōnjan dila lo, im likūt addiō ilo kōnjan dila, im karuñļok peiō ilo katin, I jāmin tōmak.
- [26] Im ilōkōn ruwalitōk raan rej pād ilowan im, Tomas ippaer; aor ke rekilik, Jijej ej itok, im E jutak eoļōpeir, im ba, Aenōmman ñan kom.
- [27] Im E ba ñan Tomas; Kwōn letok addim, im lale peiō; im letok piom, im karuñļok e ilo katiō, im kwōn jab pere a tōmak.
- [28] Im Tomas e uwaak im ba ñan E, Kwe aō Irooj im aō Anij.
- [29] Jijej e ba ñan e, Tomas, bwe Kwar lo Eō, Kwar tōmak: emōñōñō ro raar jab lo, im rej tōmak.
- [30] Im bar elōñ kakōļe Jijej ej kōmman imaan mejan ro ri kalooran, ar jab jeje er ilo bok in.
- [31] A emōj jeje men kein bwe komwin tōmak bwe Jijej e ri Kūrai, Nejin Anij; im bwe kōn ami lōke, komwin bōk mour ilo etan.

JEPTA 21

- [Jn 21.1] Ālikin men kein Jijej ej bar weaaktok ñan ro ri kalooran iturin lomaļo in Taibiriōs; im e wāween de in An weaaktok.
- [2] Saimōn Piter, im Tomas āt eo juon Didimōs, im Natanael jān Kena in Galili, im ro nejin Zebedi, im bar ruo ri kalooran rej jimor ijo.
- [3] Saimōn Piter ej ba ñan er, Ij ilen eñōd. Re ba ñan e, Barāinwōt kōmij uwe ippam. Rej ilok, im uwe ioon wa: im ilo boñ eo ejjeļok kuṇaer.
- [4] A ke jimmarok, Jijej e jutak ioon parijet; a ri kaloor re jaje E Jijej.
- [5] Innām Jijej e ba ñan er, Ajri rañ, ewor ke kijemi? Re uwaak E, Ejjeļok.
- [6] Im E ba ñan er, Komwin door ok i anwijnmaroñan, im kom naaj lo. Kōn men in rej door ļok, im kiiō re ban tōbwe, bwe elōñ ek.
- [7] Innām ri kaloor eo Jijej ej yokwe ej ba ñan Piter, E Irooj. Innām ke Saimōn Piter ej roñ, E Irooj, ej kōṇake kopā eo an, bwe e keelwaan, im ej kālōk i lojet.

- [8] A ri kaḷoor ro jet rej itok ilo wa edik, (bwe re jab etoḷok jān āne, a āinwōt rūbukwi moḱwōj) im ipertok ok eo im ek ko.
- [9] Innām ke rej tōkeak i āne, rej lo kijeek mälle ijo, im ek ioon, im bred.
- [10] Jijej e ba ñan er, Koḿwin bōktok jet iaan ek ko kom ar tōbwe kiiō.
- [11] Saimōn Piter ej iloḱ, im ipertok ok eo ñan āne elōñ kōn ek ko reḷap, jibukwi im lemñoul im jilu: a meñe elōñ, ok e jab rup.
- [12] Jijej e ba ñan er, Koḿwin itok im mōñā. Im ejjeḷok juon iaan ro ri kaḷoor e peran in kajjitōk ippān, Wōn Kwe? re jeḷā E Irooj.
- [13] Innām Jijej ej itok, im bōk bred, im leḷok ñan er, im barāinwōt ek.
- [14] Iien in alen kein ka jilu Jijej ej weaaktok ñan ro ri kaḷooran, ālikin iien eo E ar jerkakpeje jān ro re mej.
- [15] Innām ke eḱōj aer mōñā, Jijej e ba ñan Saimōn Piter, Saimōn nejin Jon, kwōj yokwe Eō eḷap jān rein ke? E ba ñan E, Aet, Irooj; kwō jeḷā Ij yokwe Eok. E ba ñan e, Kwōn naajdik Jaam ko Aō.
- [16] E bar ba ñan e alen kein ka ruo, Saimōn nejin Jon, kwōj yokwe Eō ke? E ba ñan E, Aet, Irooj; Kwō jeḷā Ij yokwe Eok. E ba ñan e Kwōn seperd Aō jiiip.
- [17] Ej ba ñan e alen kein ka jilu, Saimōn nejin Jon, kwōj yokwe Eō ke? Piter ej būromōj bwe E ba ñan e alen kein ka jilu, Kwōj yokwe Eō Ke? Im e ba ñan E, Irooj, kwō jeḷā men otemjej; Kwō jeḷā ij yokwe Eok. Jijej e ba ñan e, Kwōn naajdik Aō jiiip.
- [18] Eḱool, Eḱool, Ij ba ñan eok, Ke Kwar inono Kwar make kañūrñūr eok, im etetal ijo kwō kōḱaan etal ie: a ñe kwō naaj ḷallap, kwō naaj erḷoke piom, im bar juon e naaj kañūrñūr eok, im āñinḷok eok ijo kwō jab kōḱaan.
- [19] Ej kōnono men in bwe En bakajjien wāween mej eo e naaj kaiboojoj Anij kake. Im ke eḱōj An kōnono men in, Ej ba ñan e, Kwōn ḷoor Eō.
- [20] Innām Piter ej oktaklik im lo ri kaḷoor eo Jijej ej yokwe ej ḷoor E, eo ej atartar ioon ubōn ilo kejota eo, im ba, Irooj, wōn eo ej ketak Eok?
- [21] Innām Piter ej lo e im ba ñan Jijej, Irooj, ekōjkan armej in?
- [22] Jijej e ba ñan e, Eḷaññe I kōḱaan bwe en pād wōt mae iien Ij itok, ta men in ippam? kwōn ḷoor Eō.
- [23] Innām naan in e buñbuñ ḷok ippān jemjein jemjaten. bwe ri kaḷoor in e jāmin mej: a Jijej e jab ba ñan e, E jāmin mej; a, Eḷaññe I kōḱaan bwe en pād wōt mae iien Ij itok, ta men in ippam
- [24] Ri kaḷoor in eo ej kōnnaan men kein, im ar jeje men kein: im je jeḷā bwe an kōnnaan eḱool.
- [25] Im bar elōñ men ko Jijej e ar kōḱamAn, im eḷaññe rej jeje men ko otemjej jeḷok, ij ḷōmḱak laḷ e jab maroñ in dāpij bok ko re naaj jeje kake.